

卷之四

玫瑰先生文集卷第一

四明樓

鑰

大

防

自

古詩

登育王望海亭

瘦藤挂破山頭雲山蹊盡處開危亭平田萬頃際大海
 無所際空冥、乾端坤倪悉呈露飛帆去鳥無遺形蓬萊
 去人似不遠指點水上三山清寒裳濡足恐未免倘有礙
 馭吾當乘是中始覺宇宙大眼力雖窮了無礙雲夢八九
 不足吞回視塵寰一何隘曾聞芥子納須彌漫說草庵合
 法界看我振衣千仞岡笑把豪端捲烟海

林景思雪巢

四時不皆雪陸居本非巢高人興寄遠表此一把茅吾非

二祖可夜立寒齊腰吾非鳥窠師結廬真樹梢白日照我心不以見現消兩脚踏實地風雲無漂搖作詩窮益工寒瘦逼島郊落筆句驚人
不復尋推敲客至不問誰淡若君子交直氣干霄上下視鄙斗筭富貴頃刻花誰能等幻泡附離如幕燕自謂添與膠先生閱世熟兀坐山城均春陽謂有時豈曰終繫匏錫山寄雄文凜然豎髮毛我非敢言詩為君聊解嘲

題龍眠画騎射拋毬戲

綠楊幾枝插平沙柔梢裊隨風斜紅綃去地不及尺錦袍壯士斫鬃射橫磨箭鋒滿分靶一箭正截紅綃下前騎長纓抱綉球後騎射中如星流綉毬飛毘最難射十中三四稱為優元豐策士集英殿金門應奉人方倦日長因過

衛士班飛騎如雲人馬健駕幸寶津知有日窮景馳驅欣縱觀龍眠胷中空萬馬駭目洞心千萬變追圖大槩寫當時至今想像如親見靜中似有叱咤聲墨淡猶疑錦綉眩開窓撫卷三太息紀胡塵暗畿甸安得士馬有如此長驅為決單于戰

題羅春伯所藏修禊圖序

東游登會稽祇見蘭亭不見碑北過中山府欲訪此碑不知處間從故家看墨本如此二者絕難通曾經耶律擅裏去至今胡虜猶知慕時將一二餽虜使持歸往快先覩未知玉石真在否要比江南終近古他日縛取呼韓作編戶勒銘歸來過定武只問君王乞此碑打向人間莫論數

題孟東野聽琴圖因次其韻

誰欣在前谿夜深 琴鳴天高豪氣肅月斜映疎星椽林
助蕭瑟泉聲激琮琤彈者人定佳能使東野聽東帶不立
朝遙夜甘空庭龍眠發妙思神交窮杳冥不見彈琴人盡
出琴外聲如寒凜如對作詩太瘦生恨不從之游撫卷空
含情

壽安撫伯父

東樓德澤流無窮我公挺生慶所鍾瓊枝玉樹瑩精彩迥
然不墜風塵中少年慷慨吐虹氣文詞原不減儕輩胸中
妙蘊經綸材剴剴裁繁特餘事曾從蓮幕試牛刀舉城但
識劉功曹瀾翻薦口動天聽一語便踰華衮褒上方欲革
嶺南弊東材果得吳刺史不妨一勺飲貪泉清德冷、今
可紀憑軾雍容按七閩列郡合詞稱得人從茲十載秉麾

節坐令萬里回陽春洞庭風月滿湘兩君王無復憂南顧
抗章乞得半生閑遙指家山賦歸去廟堂未肯閑宏材大
開東閣需公來朝隨召節赴天闕夜馳使驛歸長淮廣陵
卧治要汲直金節瑩煌照熊軾底用腰纏十萬錢且看身
享二千石忽思鱸膾寒菘羹拂衣欲遂鄉關情視去西陽
如脫履意色蕭然固圃生画船重泛西湖上水光山色都
無恙主人管領東風回故園桃李倍清爽六鰲背負三山
歸輪困老檣蒼龍姿了無塵俗敗人意槩几長物皆瑰奇
橫岸綸巾披鶴氅神情直出羲皇上塵事到頭曾不聞卧
聽歌臺傳爰響百花堂前手自裁興來一盃復一盃人生
亦欲自這爾富貴于我何為哉中春况屬懸弧旦史君亭
榭風光暖東君預借一分春不許芳菲作春殿綺羅香深

初肆筵弟兄酬酢盃相傳此時更復借一醉君從何處拚
垂蓮五侯貴甚德未美簪纓不滿高陽里何如清白傳家
風奕世青氈盡朱紫燕居今喜盡比隣其如四海傾陶鈞
羽書鼎來在朝夕何數羔雁徒成群芙蓉城中有仙宅十
州三島環其側此中樂不減商山功成歸作茹芝客

送伯舅汪運幹大雅

人生自古悲別離別離今日何足悲試問今日行者誰
江名族真男兒虬鬚燕額軀十圍凜凜端有熊豹姿毅然
剛立不愁威笑視鼠輩何脂常州縣小試囊中錐政績今
在衆口碑姓名通籍黃金閨便泛王儉紅蓮池平時幕府
多素尸坐縻公粟邀以嬉只今方當多事時正要名士同
驅馳森森百萬虎與貌荷戈今駐誰東西兩淮千里雙使

麾幕中僚吏皆擢犀惟公婉畫明著龜辨如懸河不可隄
曾中武庫深難窺決策固有堂上奇朔風吹空黃草齊正
恐秋高胡馬肥萬人相顧目睽睽見公此去多腹非公獨
襆被行不疑單車西去征馬嘶平生氣槩衝虹霓恨無尺
箠笞羗夷方今天相中興期黠虜戴頭來邊陲願公速蹈
功名機匈奴不滅何家為出門千里何足辭但願滿引金
屈卮

月夜泛舟姚江

秋暑不可能幾思泛中川晚來興有逋溪船偶及門涼月
纔上弦平潮可黃昏倚楫縱所如卧看龍泉山長虹跨空
濶過之凜生寒坐穩興益佳夜氣方漫草蟲鳴東西飛
鳥相與還仰頭數明星垂手搖碧瀾坐客惜此景不及携

清樽無酒要不惡徜徉足幽歡幽歡有何好叩舷澹無言
送王正言守永嘉

江頭潮生江月小暝烟綠暗垂楊道有客扁舟送史君道
傍不怕柳榆咲向來一別三換歲正喜情親得傾倒吏民
引頭望麾旌空有離愁滿懷抱史君讀殘萬卷書古事今
事俱了一便應珥筆侍天陛不然代言登鳳沼瀛壖山水
久寂寥為屈朱轡來坐嘯怡憤峯高舊題咏赤城所在經
行飽永嘉名郡太守尊靈運後來詩絕少天作鴈蕩地為
藏蠟屐穿山未曾到改轅却向箇中去更得江山助詩好
齋鈴靜處定得句不待池塘夢春艸去年春艸上平地大
風駕浪從天杪蒼生識一魚頭聚落隨波迹如掃今年
二麥連野秀田家扶犁事秔稻史君憂國眉不開叱馭徑
行仍及早哀哉千里方更生縣官租錢酒戶曉縱民自恐
上不足誅取何憐下無告邦儲邦本孰輕重肯使疲民困
征擾君不見岩一千古陽道州政拙催科自書考

游龍瑞宮

隔山望危石老面凜如鐵路回兩屏開見此高崿嶂偉哉
名公卿莪冠會朝列又如鼓迅霆玄雲助擊烈癡雲不作
雨空翠襲冰雪野水不知原遠徑幾萬折子長真愛奇萬
里探禹穴我家甬水東扁舟輕入越竊此半日閑到處輒
清絕傳聞古洞天瓊臺照金闕神仙杳難問一笑山石裂
相逢客路中翻手數年別勝地更躋攀莫厭屐齒折

三日不得過都泗堰

南朝何公棲禹穴嘉遯悠然老高潔一朝送人都泗埭歸

歎此途于此絕我亦何為走塵埃數年不記幾往來船橫
三日不得度愧想高風安在哉

宿佛日山

平生臨平山知誦蓮花句輕帆幾來往山色淡如故寧知
千萬峯中間著往趣蕭、蒼髯翁為指花城路我來春正
濃天寒日將暮雲深鐘俱鳴自喜得勝具緬懷玉局僊老
筆掃朝霧玉梨偕相持珠流竟何所惟餘渥洼水蒼龍角
牙露人間翻覆手烈日變烟雨俗子眩炎涼三四錯賦芋
道人笑視之萬化隨所寓深坐十笏地一息了千慮箇中
誰得知幽鳥背人去

求仲抑招遊山歸途遇雨

竹輿遶湖濱宿露尚厭浥徑到玉岑下坐久客始集起穿
靈石山萬松介而立梅天氣清潤空翠行可挹古藤幾百
年枝蔓兩山及見說暮春時花紫光熠、直疑老潛虬初
起夜來蟄俯玩歲寒泉齒冷不敢吸相將上龍泓塵鞅謝
羈帛洞有靈獸居臨深心岌、魚游明鏡中巨浪無三級
寒苔載水去萬頃潤原隰濛、山雨來歸僕鳥飛急野興
殊未已日晏不暇給衝泥上湖船雨陣遽奔襲飄風將急
點回旋驚四入中流益蕩兀短篷不當笠停篙亦久之怒
勢不少戢我徒方嘯歌弗為改豪習但恥餅壘罄莫問衣
裳濕

吳江舟中

阿連久矣共一被小別愁生無夜寐風帆將我上征途回
首江山日千里小舟橫卧吳江水夢回依約蕭齋裏五更

漏急月黃昏鳥散一聲人未起

讀范吏部三高祠堂記

三高之風天與高三高之靈或可招小山以後無此作具
區笠澤空寥、几從垂虹蕩雙槳寓目滄浪獨怡悵筆端
不倒三峽流欲遽招之恐長往前身陶朱今董狐襟抱磊
落吞江湖瑰詞三章鈔天下大書深刺江之隅我來誦詩
凜生氣若有人兮在江水扁舟獨釣膾鱸魚茶竈筆床歸
甫里先生固是丘壑人只今方迫功與名謝公投鼻恐未
免便看林藪生風雲他年事業滿彝鼎乞身歸來坐佳境
不嫌俗士三斗塵容我漁簑理烟艇

遷都獨峰

漢家武徹求神仙方士極掌多夸言蓬萊隔海不可到屬
車方羊上橋山傳聞黃帝久仙去胡為有石高嶺屹游談
不經理歎屈謾言此地藏衣冠縉雲自是仙窟宅萬壑千
巖比如櫛突然一石摩青雲造化應勞巨靈擘仙風吹墮
碧蓮花玉井半空人不識望之不計幾千尺八柱擎天此
其一伯夷制行高且孤萬世猶能立懦夫英魂凜、今不
死化作此石山之隅橫斜輟迹依然我亦何能窮古初

靈璧道傍怪石

飽聞茲山產奇石東南寶之如尺璧誰知狼籍亂如麻往
往嵌空顛鏡刻長安東南萬歲山搜抉珍怪窮人間汴流
一舸載數輩徑上良嶽增孱顏當時巧匠斲山骨寘之汴
干高突兀干戈動地胡塵飛坐使奇材成棄物君不見黃
金橫帶號神運不數臺城拜三品只今零落荒草中萬古

淒涼有遺恨木人漂、不如土坐閱興亡知幾許行人沉
嘆馬不前石雖不言恐能語

括蒼溪漲

雨餘大溪觸山流氣勢直欲凌沙洲浮梁中分斷縹緲流
沫東去行蛟虬人家嘈、避新漲雲稼苒、添平疇漁翁
輕生有如此小艇橫絕隨風鷗

石門洞

扁舟百里連城回青山中斷立兩崖清都虎豹隱不見但
見閭闔排雲開峯回夫喜大飛瀑聲震萬壑驚春雷掀髯
目及九霄外玉虹千丈飛空來一冬青女斬天雪不知聚
此山之隈傳聞神龍卧其上寶箬擊碎真瓊瑰曾中先自
無塵埃到此更覺心崔嵬天風為我嘆空翠春水瀉入騷
人懷謫仙曾來寫勝句劉郎又為開天台我慚筆無挽牛
力醉墨滿壁誰為裁或言龍湫更奇絕佳山高處深雲塊
我方携筇往尋訪未知比此何如哉

大龍湫

北上太行東禹穴雁蕩山中最奇絕龍湫一派天下無萬
衆贊揚同一舌行、路入兩山間踏碎苔痕後將折山窮
路斷脚力盡始見銀河落雙闕矩羅宴坐看厭騷人弄
詞困搜抉謝公千載有遺恨李杜復生吟不徹我游石門
稱勝地未信此湫真卓越一來氣象大不作石屏倚天驚
鬼設飛泉直自天際來、處益高聲益烈漢地倒瀉三峽
流到此誰能定優劣雁山佳趣須要領一日盡游神惡褻
驪龍高卧喚不應自愧筆端無電掣輪囷蒲索端不怒非

霧非烟亦非雪我聞凍雨初霽時噴擊生烟風散空濶更
期雨後再來看淨洗一生煩惱熱

連雲亭望海中諸山

雁山本在雲海中波濤千古相撞春泥沙洗盡見山骨岩
壑所在皆玲瓏是誰一口吸水盡平地卓立成奇峰至今
往、有遺迹相傳渺漭何能窮我乘單車來自東佳處十
數一覽空晚登四十九盤頂曠望巨海烟濛、群山錯立
不知幾朝日照耀天霞紅是間瑰奇定多有鯨波掩蔽深
莫通我無太真燬犀法安得一闖馮夷宮會無滄海變成
陸却與雁山爭長雄

寄題張法曹瞻雲軒

張侯雲軒意可知如登太行看雲移我雖未得登軒墀不
鄙要我巴人詞爾時膝下邀以嬉欲斷數語、不隨娛侍
東嘉樂無涯官舍偏仄親不怡安輿相將甬水濱日、東
望勞支願秋風得檄欣星馳歸拜親下聊信眉官事有程
不得違款去故國行遲、重來橘柚黃金垂霜着新蟹雙
螯肥海魚甘鮮一尺圍欲奉色養春為期瞻雲之思今同
之慨然落筆成新詩人間至樂在庭闈何用自縛微官為
君方款解左顧龜我亦日思投檄歸相望百里俱萊衣從
他天外間雲飛

次韻翁處度同遊北山

兩夫持鑿行我先巧尋徑路其智專我扶枯藤行衣短後
意氣已出層峯巔何即鮑叔鮑經歷勝處一、手自編我
攜舊記訪陳迹正恐急景不得延 當共登青雲梯今日

邀我共擊鮮始觀神龜闢青泚上有石壁來飛泉隱青遺
基平可坐下頽亂石如磨鋌懸崖雙瀑洒空雪來自一握
孤雲天却從下流沂深險崎嶇直到清潭邊朝陽射光破
幽悶斷虹上下遮潺湲傳聞高山更高處雅有行路從西
偏同行無乃深好事盃酒自搗脚力全誅鋤荆棘從鳥道
欲進不得愈意堅旋呼童僕累危石笑採野菊聊盤旋捫
蘿騰身上苔磴往、歡呼爭著鞭側行危步汗浹背石角
或使衣裳褻少烏身在雙瀑上又見高派衝泓淵自咲泉
石成膏盲愛賞不減蟻慕羶巉巖數峯巧遮護妙處二老
初無傳脫迹塵埃到此地便覺神思飄、然回首江南塵
一聚城廓歷、眼欲穿相期更看水流處步履未倦夸輕
翻一上千尺窮山椒碧澗靡迤流蒼烟尋源不能且望返
石貌魏距驚神鑄退求歸徑惘難問藤蘿所在相索纏我
方踟躕風烟表披、衣袂身欲仙晚歸朝提各痛飲讀盡
屋壁長短篇截筒環山覽清駛竅出珠穗心亦憐棊枰相
與論瓜葛橫琴不妨揮五絃人生易老費扶掖勝具大率
須少年伊余歷聘佳水愛竒竄慕太史遷明年炎暑襲故
步與君共枕清流眠

游白石巖

我游仙都觀獨峯輟迹雖在車不通鼎湖望極幾怙悵、
無羽翻凌天風茲來樂成望白石玉甌突兀摩蒼穹人言
真人老聃商鑿開洞府遺仙踪無人共登青雲梯躋攀伴
我惟枯筇索回約畧三十里踏遍萬疊高巖從斷崖冷、
落殘雨雙石凜、亭孤松却從山椒下谷口石欄屈曲遮

碧椽頗疑山高氣凝凜古來積雪今未融是誰玉斧妙鑿
斷山洞雙闢驚神工岩深白石尚幽閔別有石竅開天聰
傳聞峯頭貯清泚苔罅涓滴聲冬瓏奮身更與上虛閣海
山錯立烟濛、脚底千山行伏龍手揮五絃俯冥鴻霜林
搖落當玄冬長嘯一覽萬象空解衣寄宿旦過寮魂夢一
墮冰壺中曉看日出滄海東蠟炬百萬燒天紅眼高不數
雁蕩雄行曰下笑康樂公未能辟穀追仙翁頗亦有意棲
林宮三山不覺去人遠安期羨門宜相從驂鸞駕鶴太多
事但欲御氣游無窮

約諸公再游龍湫

昨暮與君上龍湫天久不雨無湍流嘯呼拊掌喚不應悵
望頗亦令人愁夜來雷鼓驚龍起溪聲已覺亂人耳真辭

重訪尊者居坐看倒翻三峽水

送劉仲起主簿

劉郎鳶棲海瀕邑不減向來人姓習凜然軀幹即之溫語
恐傷人中有立論交雖厚笑甘醴御史以嚴無束濕公餘
黃卷頻卷舒藝圃工夫日加葺永嘉素多君子僚休沐新
盟有清集伯倫忽去誰鯨吸欲挽不留情悒、君年方盛
才有餘逸驥寧容在羈馱期君速踏功名機塞草連雲朔
風急

工侍御壽詩

史君威名聞四方南床凜、凝秋霜史君和氣到甌越暮
府初開夜飛雪頗聞此雪何歲無定知來隨御史車黃堂
洗印未多日慶朝况此當懸弧明年豐登日可數父老兒

童羊起舞遲明賀版擁譙門試捨歌謠作詩語史君風度
神仙人相門出相寧非真妙齡兩科談笑得晚趨巖台依
風雲臺端敢言姦聽聳至今讜論時傳誦踏遍巫山十二
却尋春草池塘夢人傳史君威稜、我知威愛元兼行蒼
髯如戟面如鐵惠養自有循良稱高牙入境紛進謁賓屬
廷趨躬磬折民生共喜愛日溫吏行獨畏春冰裂向來夔
州妙籌邊夷蠻膽落皇靈宣還朝奏課居第一夜半帝席
為之前東嘉今為股肱郡小試望之三輔近會循故事入
三公致君要使登堯舜東風未動春先回梅花照眼歌筵
開吏民合詞誦難老一笑千里傳銀杯佳兒恂、授衣鉢
玉樹芝蘭俱秀發江南古曹比長淮更看雲來萃簪笏平
生知己今上天敢復坐嘆寒無糧已言未足贊公壽載誦

峻極高高篇

鮑清卿病目不赴竹院之集詩寄坐客次韻

鮑侯年少老文學藝苑優游富畊獲曾中涵養自成趣妙
處正恐兒輩覺我慙門巷非尺五字欲問奇推與權開樽
竹院望同醉遮眼胭脂何太虐團團十客踏雨來相從不
負東風約投壺雅歌了無恨祇恨車公一前却海棠春深
照眼明風物融、悟非昨從教雨洗胭脂淡小摘何妨供
把握夜闌燒睡照春燭靚妝如在結綺閣墻頭西望爛蜀
錦嫣然一笑無聲樂飛紅點地綉作茵正須席地天為幕
要知富貴出天姿艷杏天桃何足錄主人小菜真好事肯
學區、專一壑洞門不鎖要客來笑君太似羊公鶴雨餘
珠淚色慘悽一顧正嫌無伯樂忽驚新詩來叩門妙語天

然不煩琢坐中傳觀字欲漫我豎降幡甘面縛清明已過
雨不休雲霧猶屯四山脚揩摩病目不應遲及此紅英半
零落枝頭尚有未開花縱已披離亦何惡知君既負西岑
游莫使一春終落寞會須來此共賦之正要重聞誦新作

贈光孝益老

光孝長老師益蘇魏公諸孫兄延壽為台州判
官別四十餘年一見歡甚林吏部有詩次韻

鷓原鴻雁行此理懸諸天萬事可變滅天性難推遷顯菴
幼出家潔饑同玄禪一鉢寄西東悠一經幾年外慕等浮
雲百念灰無烟難兄忽相逢觸動歡喜緣光陰信可惜征
袂何翩一叱昏掩簿領來同妙峯禪刺道家去客淚如
迸泉玉堂與黃閣衣鉢親相傳游宦非為貧不敢替所先

老師雖晏坐至情豈棄捐此會非偶爾絕倒秋風前手持
詩卷來謂予得無言曉以天性語人生要有原嗟哉偽日
薄箕豆本同根一旦成仇敵釜中急相煎寧知有佳人芳
草夢阿連相見無幾時瞥如魚躍淵固知出法惜別詎
不然又當作大觀勿為愛網牽千山元不隔毋庸對床眠

送王道州

九疑之南為春陵瀟水清駛山為城郡齋正據山直上一
覽萬象無遺形家君頃年入蓮幕我不得往空馳情先生
分符此中去心旌搖颺隨雙旌先生平生飽文學身上著
作承明庭與篇隱帙辨如響一時自許文章鳴高詞坐奪
造化巧凜一韶濩聲鏘鏗把麾江海非無意親扶版輿賦
南征頗聞楚俗未蘓息糟糠不厭嗟疲民正資儒術飾吏

事拔去強薤摩孩嬰政成環召事未晚天子日夜開延英
風流千古三刺史往繼聲叟陽先生毋庸自書追科考但
願寄我春陵行

哭王知幾墓

知幾少也爽萬事莫談了自謂頗寡合見我輒傾倒百年
能幾見一別迹如掃父子俱埋璧烏乎何其早向來論文
酒和淚傾宿草此意誰復知寤歎令人老

仲舅尚書生朝

去年生朝燕稽山館舍朗一屋百間紅裙合樂飲徹旦坐
中上客皆醜顏今年生朝半歸路竹輿滿一曉衝雨回頭
風景非去年當時賓客今何處仕已喜愠曾何分適齊未
減楚子文鼻間棚一固自若世情物態徒紛紛平生知足
志閑退歸老鄉閑了無悔但欲年一醉西風坐閱人間百
千歲人間萬事日不同尚書人望方顯、明年舉酒拜公
壽安知不在槐庭中

送鄭惠升司封江西提舉

君名切斗魁步武上霄極蓬萊群玉府圖書照奎壁郎官
應列宿寢覺象緯逼胡為作使星炯、向江國仰奉鶴髮
親版輿映萊服昔日紅蓮池帥垣資腕畫方將散餘潤連
城被膏澤官權與民絲豐儉煩振糴小試活國手疲民賴
休息便歸侍玉皇拱立香案側富貴殊未已行、上鸞掖
君其妙演綸三能看齊色

次韻胡元甫茉莉花

殘暑未盡秋歆未玉刻萬葉瓊英開孤標雅韻一枝足江

上紫翠空成堆素娥常與明月約青女細把輕綃裁主人
好事趁時買。真此地真宜哉墻間閒地方丈所幾年累
甃裝層臺春花秋卉方互發胡葵芍藥參徘徊眼明忽見
此竒絕第畜素馨兄事梅夜深飛香性幽獨未許蜂蝶來
相陪糖甕封餘有閩玉會須掃取添花哉吾聞閩山千萬
木人或視此齊蒿萊何如航海上天闕玉色照映琉璃杯
新涼徙倚看不足坐見日影歎庭槐

同官登勅局小樓觀雪

去年歲豐登雨暘應時須所欠惟一雪祈禳遍精廬晚亦
粗飄瞥六花舞空虛雲氣不待族風伯隨驅除殘春寒尚
深忽見雲模糊撒鹽壓蘗茅晨興粟生膚隨班上原廟恍
若登蓬壺岩堯宮殿深朱扉黃金鋪百神會靈居半天散
瓊琚又疑守護嚴寶網絡明珠參差鴛鴦行簪笏皆沾濡
退歸冷局中窓間竹扶疎為思此絕景往。終年無不應
憚凌寒閉門守紅爐為君登危樓深杯泛醪酥窺魏瞻吳
山莽蒼望西湖瓊枝宿饑鷹玉街走寒韓盧酒興萬里遠
容我歌且呼坐欲斲五言所愧李與蘓君與工屬聯灞橋
去騎驢

久不作詩喜仲兄遷鄰居因成長句

宦游各天涯皇州今雁行官居半里所相過復相望西隣
得老屋往來連戶窻水竹占幽勝風雨對一床十里短檠
燈今夜分餘光兒曹亦可樂吟誦聲洋洋。天邊有白雲隨
風正飛揚相期奉旨甘萊衣戲親傍軒冕皆倘來此意可
暫忘詩成喜可知且復酌此觴

送林劭宗丞浙東議幕

先生風骨天與清孤松野鶴何瘦生曾中落、笥五經大
篇短章筆縱橫壯年文場諸老驚俯仰去故雙鬢星萬事
不理詩自鳴笑視軒冕秋毫輕市者爭利朝爭名著脚往
往遭譏評先生四五官神京又復歸去鴻冥、臺家急賢
理不應况復察舊離觴傾先生自喜得此行祿粟可已啼
號聲秦望之山高且平卧龍橫巨環州城鏡湖千頃波不
興晋宋遺跡多豪英議幕了無塵務縈撫物弔古皆閑情
我亦久矣懷滄溟旦夕款求緹油屏相望縱復三四程詩
筒尚得尋前盟

臨海縣治琴堂

子賤彈琴真是琴我今無絃知琴心使我不得琴中趣絃
以修綆誰知音才術高低不自由單父二子心則侔後人
不得彈琴暇勿以戴星為可羞

送石應之司戶歸剡四首以室適人遠為韻

捷徑指終南索價譏少室窮達豈無命踏地胡不實之人
吏海隅所吐百未一夷途淡無營君其有終吉

右一

年來嘆離群磨琢殆無幾資凡學益落駕駘費尺蠶羨君
富春秋發軔方自邇驛驢更着鞭洗眼日千里

右二

南明千古秀慶源久益新剡溪照人清况復屈斯人搵袂
不容留枿觴思拜親他年風雪中扁舟倘知津

右三

平生企賢心山川恨悠緬寧知日相見懷抱竟不展樽酒
了無暇離情古深淺室邇猶許踈况今乃真遠

右四

送王仲矜倅興元

蜀道難、於上青天蜀道易、於履平地蜀山天險固自
若視難為易在人爾王尊真有四方志叱馭行經了無累
早登岷峨任陰城談笑動行千萬里漢中由來說難助意
謂棄之為可惜君今此去良似之更欲遠游尋故迹漢都
南鄭啟炎菑秦置石中山徑關淮陰拜將餘高臺武侯墓
處空松柏大笑出門何慨慷天涯離愁各盡觴荷君走馬
却送我李侯參語夜未央君方往蹈功名機何止別駕歌
王祥先正九年遺愛在更遺故笏訪甘棠仲矜象簡乃恭
政入蜀時所用

中山

兩螯鬪巔隨西行勢歛吸盡西江清是誰縹以千丈城歛
去不去豈不靈化為青山鎮東溟首冠窳堵雙崢嶸安輿
從東喜逢迎笑指螯背同來登春殘雨足綠陰成山鳥相
和聲呶嚶自從半山經小亭仰望巨石扶軒楹千山萬山
擁翠屏陰霾歸靜纖雲興翠微下有長江橫衆、不盡千
古情橫軒俯瞰萬瓦平佳處歷、堪指名雪蓬感雲連曲
肱蜂房蟻涇棲殘僧扶欄更上三兩層一覽物象無遺形
徙倚未厭茗椀傾長嘯兩腋清風生親顏甚怡輪為停我
亦色笑喜不勝願我雙親俱遐齡方瞳鍊顏華髮星如此
兩峰相對青

泂激柯山歸別張特秀

我昔志學年侍親宦西安弟兄游庠校見君平生歡君才
獨穎出逸駕不可攀夜窻共檠燈春游同杯盤虛堂卧雪
嶺傑閣橫雲槃爛柯上危磴烏巨公溪灣是時氣相高辨
論俱亂翻一別三十年天街見裁剋殿廬者決科藍袍立
清班黃牒猶墨湿大弨力能彎爾來又一載短書能幾番
茲烏捧檄來吏牘方拏煩室邇嘆人遠一朝脫籠樊滿意
縱劇談痛飲到夜闌十步九太行此事亦孔艱進哭老先
生畫圖慘青綸時顛頤何為一昔成大還曰思我伯氏人
琴有餘嘆感今念疇昔相與涕淚潛故人悵無幾恍如春
夢殘有酒不得飲有琴不成彈復歸坐冷屋使我凋朱顏
我歸不可遲倚門夢連環君言欲春糧伴我行路難欲去
不得去僧坊話間閑年各幾半百後會髮亦斑何處更有
潺、君有門戶責殷勤願加餐

次韻沈史君懷浮岡梅花

玉人迥立山谷裏不有使君誰與憐毋庸高牙煞風景為
着佳句增孤妍寒溪照影漫千樹橫笛吹殘又一年傳聞
年後更多在便須躍馬趨平川

送王木叔推官分韻得錦字

王郎天下士中和自生稟澹然初無營見者輒歛衽幕中
資婉畫處事極精審與人如恐傷律已淵水標深恐馬駛
輿要使鴟食甚一寸憂國心幾年不甘寢此意大未酬退
靜若已甚使之行所學庶幾人真枕向來孰間之未免斯

立噤川泳而雲飛賴有東陽沈露章極推轂分韻句裁錦
風流有如許不復嘆蹕蹕如君豈蓬蒿人物妙流品才應
奉香火為養謀祿廩與君幸瓜葛心交今十稔豈惟我惜
別行道情苒苒紅蓮色何似翠栢風愈凜願君踈藥裹一
意護茵飴棄鼎寶康瓠浮名如拾潘行矣無多言臨歧且
劇飲

彭子復臨海縣齋

乾道癸巳冬此邦我經行鬱攸氣未殄十家真赤城來訪
臨海令瓦礫紛縱橫翹然二尺高問是戒石銘徘徊重太
息更聞愁嘆聲試詢來者誰共言今姓彭我時語旁人此
邑其將興迨予來 倅客館方暫停夜聞簫鼓沸聽事先
落成起望輪奐美壯觀聳連甍百堵日已作斧斤喜丁

層樓度勅書兩廡環中庭久乃游其間宏大使我驚位置
既深穩斷削仍攻精田里不知役纖粟無輸征安得屋朗
朗突兀有寧馨退食不苟處扁榜皆佳名中虛物自照政
平由心平樨栢已可悅况有賢弟兄小亭真吏隱縣擁高
山青琴堂雖增舊此意宜細評智調天下理夸言笑後生
大弦可以急小弦恐弗勝舉意屬俄頃立欲如所營手足
民無措吏姦益相乘不如踈節目示以信與誠施行有次
第幽遠無隱情上下始相應溫和亮以清子賤意不傳僅
許勝戴星彭令蓋得此所以千里稱此非以政學淵源甚
分明行笑解印去衆心已先傾太守薦之朝一鶚飛青冥
傍無虺蟻援日夜思歸耕我無薦賢柄直書氣填膺安得
採詩官取以徹明廷

送虞仲房赴潼川漕

我来丹丘乘貳車送客往一萬里餘盛山使君別寢久漢
中郡丞新寄書公指四明喜鄰境典午何知成畫餅揚旌
忽作種梓行去路六千抑何迫餘杭名家多俊奇君於輩
行尤白眉雍容晉韻足夷曠百家到手無停披向來郎曹
天咫尺引身閩山接商舶賈胡仰嘆清節高霧中親見越
王不此行叱馭不作難手遮西日又長安長安日近公應
住未放使星臨蜀山不然一行亦不惡潼川應如錦城樂
鄧侯功名凜如在拾遺風采今猶昨流馬木牛諸葛公飛
輓正欲修前功蜀民險遠日凋瘵摩撫要令畿甸同况公
五絕追鼻祖隸古真有两漢風歸來富貴固未晚為傳此
學川西東

奉口遇雨

七月欲盡八月初天久不雨暑未徂下田焦卷上田槁愁
歎不止田間夫嘔啞水車日夜響漕河揚塵成坦途喜見
此溪深且廣玄雲忽起西北隅林間槭水漚起兩岸人
物歡歎呼未聞滂沛潤龜坼且使萬物聊沾濡船窻飄洒
踈篷漏客意自適涼襟裾引身東望雲氣薄未知帝城有
此無傳聞今日方奏告便有響應來斯須人家百萬苦炎
熇君王齋禱幾月餘又向雲師雨師其疾驅

遊天台石橋

西龍爭欲赴深壑觸破山骨成修梁滔一共出一門去凜
凜直落千丈強初疑鞭石跨滄海絕勝乘鵲橫銀潢要須
高躡前峯過往叩山中真寶坊

玫瑰先生文集卷第一

玫瑰先生文集卷第二

古詩

史少師賜第賞芍藥分韻得木字

帝城有僊山雙徑森萬玉洞戶入深窈突兀見華屋相君
領衆客紅藥想芬馥霜刀妙裁剪胭脂點冰穀枝弱不勝
花翠葉共斜矗向來爭春風桃李媿粗俗百卉紛何在庭
樹擁新綠此花丈人行儼立見幽獨相君戴花笑和氣俱
可掬人言此花勝相君意傾屬誰知心廣大何物不蒙福
豈以庭中花而肯棄凡木君看擇勝具所在可追逐自言
居閒時情話會親族一花有可觀爛賞費銀燭此心何揀
擇寓意本無欲以此宰天下以此鎮藩服兒童與走卒人
人歌相國有能達此觀春風四時足

送錢伯同寺丞守嚴陵

嚴陵錢使君丐外得請外府同僚相與飲餞于錢塘之津某病疹弗得預方得請之初某嘆曰去年送君來今年送君歸君笑曰此即送行詩也卧病枕上口占

去年送君來今年送君歸君善全去就我獨念別離君是忠孝家龔紫傳金龜門戶二百年所寄在一夔少年便老蒼況今更險夷不獨妙言語理窟深莫窺健筆照手澤典刑從可知向來禦祥琴欲把江海麾促召歸田班退食方委蛇世事等飄瓦人情歎然莫向非渾金質百鍊豈不哀浩然賦歸欵潔身而去之為僚曾未幾棄我忽若遺君既棄我去謫仙復追隨陡去二良友摻袂重分歧前別易再會亦見當何時才具素絕倫涵養日以滋且為放嚴陵赤手摩瘡痍歸來應不晚青氈當屬誰願君厚自愛歲寒尚相期

送楊嗣勳校書守眉山

我生東南陬不識蜀道難觀君眉宇秀想見岷峨山漢庭射策時連璧照鴛班伯氏書萬言逸駕不可攀茲焉從君游頗得窺一斑仙凡隔弱水接辭良亦艱矧茲萬里別望望何當還三蘇騎鯨去詞章滿人間豈無後來者遺珠有餘歎願君効樂全飛章達天關報國此最急餘事付等閑宣室行見思朝暮當予環別語敢言詩屬聯不容慳

送何道夫祕監守潼川

妙齡冠蜀士名聲振玉畿晚隨召節來天朝增羽儀我昔

倅丹丘鹿侯掛冠歸群公俱祖送見公四三詩頗恨着鞭
先自言乞身遲奉、慕下風直欲夢見之還朝挹高致氣
宇清且夷稱者不容口往、同一詞始見荷傾倒笑談款
忘疲况當秋風高濫吹參試闈鼎鬱得一嘗豹班容管窺
牀度真似道莊生信忘機親踈皆不可况容磷與淄諸生
得公來謹曰真吾師叩簾或三請響答了不疑私謂如此
人定應備論思胡為歸興勇抗章氣不衰鼓盆萬里外抱
孫更成悲擁麾東川去無人留孔戔別懷不自勝別酒聽
淋漓他時念老成追鋒且復西公能重来否此意非吾私

送趙子直貳卿帥三山

一蹴登從班人胡謂公遲建牙帥七閩人胡謂公疑公今
第一流志搢古與期兩州有遺愛江西愴霜威重来長道
山批勅蕪瑣闈一片憂國心輾轉中夜思正色抗危言傳
誦滿紳綏造膝有啓沃削藁知者誰此心與天通此意上
所知所以名愈尊萬口同一詞進用恐不速小却成嘆咨
天語自照然更欲試望之况彼三山重謀帥皆衮衣茲行
豈細事報政不待期登門恨寂晚臭味忘賤微自慙空惜
別不解留孔戔十連終歛惠居中乃其宜試問行道入但
知望公歸

玉版鮓次陸子亢即中韻

鱗黃不減鯨與鱸送風鼓鬣噴腥涎漁人不顧浪如山談
笑坐致扁舟前一釣香餌不得去何用大網相索纏揮刀
紛紜鬻肉骨巨口噉嚼誠可憐珍鮓萬甕不論錢頭顱萬
里賴行肩星即日參玉版禪頗厭蔬食供盤筵尚書親作

孟宗寄坐覺七箸生春妍却笑多事張茂先光怪異說空
十年

走筆送僧義冲

一氣行太虛流行紛不齊要之本無物洞然無足疑梵志
有至言還我未生時燒了似不曾亦有毛僧詞冲師名家
子少年習裘箕談吐霏木屑落筆皆珠璣自稱十年來不
復念作詩空門坐枯禪綺語知昨非聞之意已消談笑到
日西習氣終未盡舊編還自攜秀句堪供佛古作力可追
愛玩不去手未免成一癡又欲上西湖駐錫來語離我生
墮宿業筆研置藩籬拔擢困胃腎未老神已疲幾欲焚故
稿要使心清夷君詩既不作何不等棄之萬事都放下一
意探玄機語罷復自笑無使高人知作詩固無用叅禪六

胡為勸人反自蹈此紙何必揮不如兩俱忘他時赤體歸

催老融墨戲

古人惜墨如惜金老融惜墨如惜命濡毫洗盡始輕拂意
匠經營極深憂人非求似韻自足物已忘形影猶映地蒸
宿霧日未高兩帶寒烟山欲暝中含太古不盡意筆墨超
然絕畦逕畫家安得論三尺身處生緣俱墮甌人言可忘
不可親夜半叩門寧復聽三生宿契誰得知一見未言心
已應巖傾千丈雪散空上有清池開錦鏡意行忽一發虎
笑許作新圖寫幽勝歸尋一紙五十尺傳以礬膠如練淨
自知能事難促迫捲送松窻待清興筆端寸一何如西
抹東塗應畧定何當一日快先睹洗我昏眸十年病

獨旦蕈次九五從林韻

朝菌晦朔雖不知食之實貫東南味庾卽二十有七品一
見流涎應絕異擷蔬剪韭皆可却味苦應無夏蟲避大阮
哦詩聲未了又索蒸芝今再遺邇來枯折尚未茁拳、頗
媿臺無餽倘容小摘寄情親會遣長鬚見芹意

雪

丙午九月才入冬晦日忽驚雪墮空傳聞都城更復早萬
官入賀明光宮自從開霽更不雨和氣直似青春濃斗柄
插子日丁卯夜煽裂缺鞭雷公從以震霆至三四驚破蟄
戶紛昆蟲寧知玄冥全未究翻手作雲千里同暗窻初聽
洒珠電巽二滕六方施工一日喜見瓦溝積恐寒待伴烟
不融二日三日遂盈尺膏潤四海恩無窮古來詩人詠不
盡巧思橫出昌黎公少時奮筆不肯已老矣袖手便踈慵

兒曹作戲記昨夢舞後獰距金雙瞳誰人苦欲撩詩思更
作玉山高數峯移將劉、兩冰柱輝映愈覺清心骨見之
躍、忽技癢起呵凍筆尋詩筒開門一看天宇濶素峴百
萬翻長空瓊樓玉女滿妙界千林寶樹春玲瓏恨無高臺
三百尺縱觀萬象凌空濛固知幻景有變滅一時如入崑
閬中仙家俄頃閱塵劫安知此際非神功騰喜年來米價
賤便欲扶犁隨老農墻頭濁醪走來過相與痛飲歌年豐
少兄及真率會

畫錦坊中作真率群從相過無俗物主人就樹折楊梅醉
倒薰風涼拂、小舟傍城登雉堞坐看白鳥蒼煙沒須臾
撐出洞天去傑閣三層高突兀樽前賦詩貴神速十分鈍
如遼天鶻從他銀漏促殘更要見林間紅日出

送元聲弟赴水陽監鎮

吾翁積德厚九子官其六不幸失二人孤嫠紛在目三弟
尚白丁升沉猶未卜吾人扶門戶參立如鼎足脫死憂患
餘備親須水莽阿連先着鞭去、長江曲弱冠承賞延十
載荷衣綠間關困家食才就五斗粟要知官無卑毫髮當
畏肅督耕兩大圩受輸十萬斛處之誠未易勉旃直自勗
執別動萬感酌酒再三祝吾子素解事涉世要未熟意行
須揆理言輕恐招辱王事究一心言玷復三復細行累大
德陰財損陽祿豈惟贈爾言余亦每自慙公餘稍有暇更
取故書讀行矣更自愛家聲要人續

伯中弟生朝賦荼蘼

春日之風雨不知艷陽天桃李俱成塵懶上西湖船春餘
忽微和酴蘼發清妍池塘芳草夢况復向阿連中庭月方
午密林澹清煙蒙、青羅帳餐、白玉鈿幽歡久不講群
從俱謹然銀燭須高燒妃子浴清泉花以酒為名我以杯
相傳爛醉不復辭此會期年年

黃巖令鄭仁叔索委羽洞詩

君不見王君羽化脫秦厄故山至今名落翻又不見烏程
野鶴投髦毛佞臣稱瑞民斯勞何如奉林控霍登青霄蕩
然委羽登山楸青衣出入洞方香紫氣氤氳風尚飄今君
頗似丁令威霍叔久去雙鳧歸山川良是人民非一新琳
宮還舊規黃山父老歌循良誦君詩句游雲房更將名比
堅操百歲猶能徹骨芳

冰霜

青林

郡齋偶休沐驅車出西城依、山水佳瀟、松柏聲雪餘
春意動新綠生坳泓行、到青林老眼增雙明主人喜客
來倒屣欣逢迎幽居跡甚遐健筆詩方鳴回首幾年別千
里搖心旌相見又睽隔此意猶未平不如造齋閣四座酒
重傾風流陶彭澤翫麟阮步兵看劍引三尺論文驅六丁
綠野秀橫檻山寺傍連甍石罅幽泉溢脚底輕雲生詩盟
忝予會窈道從君爭哦詩谷禽應列炬林鴉驚清歡未云
足累句忽已成環坐絮十眉舉酒酬三英滿巵酒醉墨歸
夢含餘清我方媿此集君欲尋前盟吏鞅方縛我秋風為
君行

隱清

右軍訪文 遁跡入深竹我來尋歎歎人亡但空谷靈龜

闡澄潭華宇對飛瀑若人今何之尚想蕩茅屋吾聞右軍
子千載守孤獨楚興不可招懷哉愴喬木

送劉晉父監獄

濟南劉夫子生來逢百罹乃翁負長才宦游至京西時當
建炎間寇盜紛不齊轉徙入湘廣一家屢貼危五羊買海
舟萬里鮫埼舟破投永嘉有如鳥擇棲哀、老治中藁葬
山之陞母家在衡陽孤嫠往相依久卧漳濱疾羈窮命如
絲事母以孝聞執喪禮無虧廬墓屏葦茹至行徹丹墀有
詔罷數蕃得官祇奉祠行年六十二霜髯照虎眉慨然念
防墓千里來海涯西山如蓮花古今冢纍、况此久宿草
蕪穢不復治孝思雖甚切冥漠何從推行道為興嘆智力
無所施有僧幾九齡自言記當時君聞亟叩請東岡指荒

基吾師慕泓公少也從吾師墓中有版識倉卒不暇碑素
棺無石槨灰炭週四圍君方感斯言鑽穴從旁窺其言皆
可驗自此不置疑惟餘蓋棺木遺骨不堪移斲石表故阡
遂塞無窮悲此僧老而壯斗酒如覆卮與君登山柈下上
幾如飛談事才數日溘然不可為孝感人益仰真有神相
之君曰某不孝遷奉致失期未得如有失既得涕滴願嗟
哉誠寡陋識君頤已遲一朝未短札謂我從此辭皎、真
白駒安得施繫維戴侯舊山長參語心相知謂余當詩此
頽風激澆漓世出世間法君方探玄機引證即賸語焉用
韻散詞衡陽尚寄書當有鴻雁歸後會渺無日為賦古別
離

王成之給事圓山堂

烟雨望麗陽前山羅紫翠照水挹南明不與巾子對揭耒
登圓山一覽萬山會蓮城山固多此地要為最主人意軒
豁物景供曠快山柈湧華屋迥立風埃外一物無遁形所
在見纖芥清霜肅天壤佳樹隔闌闌俯仰隨取舍左右從
眇昧門墻尋故步杖屨許從邁恍然至絕頂更覺宇宙大
樽酒屢勸酬棋枰更勝敗秋高月色皎浮雲了無礙不俟
攀仙掌徒手吸溪瀨茲堂極崇敬意若欠深邃先植易生
木徐待松栢允望遠仍可喜意滿聊自晦無使山下人或
得窺外內但恐趨賜環樹藝或不逮先生味斯言一笑相
領解吾將飭園丁隨處添翳薈他時遶扶踈吾廬益可愛
游初暘谷及白巖

重来游仙都止欲訪獨峯寧知一峯外佳境無終窮何處

穎川子鏡巖便相逢約我游白巖輕舟借溪翁齋餘尋宿
諾秋霽波落、清澈見石底鏡刻驚神工昨登初陽谷但
見石嵌空茲浮懸崖下萬石森巖從上有勝絕地古語留
郭公鬼神謹呵護雷霆掃塵踪換舟到白岩修篁搖清風
縈迴進石屋孤竹攢沙鋒洞府仙所閱無由辨西東扣舷
過岩下數仞如崇墉石趾平如甃竒怪遮蒼穹更尋小蓬
萊俯瞰馮夷宮篙師進深窈捫蘿捨枯筇游子非不多無
人解從容我同一日留幽尋極山中秋晏快排蕩日煖如
春融歸坐獨峯下石影橫空濛急呼醪醕清澆此磊砢曾
幸有濟勝具未能上金龍為君揮五絃決皆送飛鴻

夜游獨峯下

峯背正白月舒光峰影橫野萬丈強仰之彌高立卓爾蔽
遮星斗摩穹蒼半秋風露清徹骨望一直欲隨風翔歸尋
玉虛步松徑月輪正湧門中央

送顏希聖尚書守泉南

聖朝寶運開虞唐太平天子垂衣裳恢張治具崇儒良孰
不顧依日月光用之則行舍則藏孔門賢德遙相忘朝望
方隆位文昌跬步可到中書堂問公擁麾何太忙公獨三
請志益剛俞音一下具鴻翔行李徑出臨濤江爭留孔幾
動朝行公更偃俯不敢當老成全德真珪璋温如春風儼
如霜柏臺歲夢蕭朝綱賢閑向風士氣揚大天小天稱公
方五年吏姦盖而彰金華勸講言加詳明主傾耳聽皇王
盍膺枋除任贊襄名遂身退天所減明哲保身更康高
風可仰不可量泉山壤土接臨漳建牙千里開封疆老龍

負圖寵煌、何殊衣錦還故鄉賤子薄宦接王楊曾陪御
史臨文場風簾官燭夜未央劇談猶記聲琅、茲來誤
尚書郎始尋故步依門牆西風津頭望歸航輓公不留遠
將兩宮念公未詎忘公雖遠去如在旁庶幾重来上錢
塘夾輔大業恢中邦倘有重事須平章

陳順之靈壁石硯山

陳順之靈壁石硯山中有雙澗低處為硯下米
元章題云唐弘文館校書李群玉有詩南唐李
重光故物也

名画法書環四壁中有米家真寶石壁峰森聳外澗流他
物雖竒敢爭席舊屬半山老仙人佛印乞之如乞鄰阿童
有力負之走一時攘取成紛綸此石天然非琢磨是時有
水生岩阿至今研池尚餘潤歲月既久惜不多幾年徒見
士夫說一旦喜看形偃月傍連玉立兩於菟主人照映冰
壺澈陳侯之富可敵國會寶光驚四塞呼童吸盡硯中
水更為輕番玩竒刻不堪回首江南李空唱多愁似春水
更不如此石千載傳玉砌雕欄等糠粃寶晉得之真不易
身後寧知亦輕棄只今傳玩知幾人當日瑣窻空自秘端
歎爭名南北部勿向雷門揚布鼓銅臺錫瓦更不須祇合
觚稜陰風雨

跋汪季路所藏修禊序

永和歲癸丑群賢會蘭亭流觴各賦詩風流見丹青右軍
草禊序文采燦日星選文乃見遺至今恨昭明字畫最能
意自言勝平生七傳到永師襲藏過金籙辯才尤祕重名

已徹天庭屢詔不肯獻託言墮戎兵妙選蕭御史微服山
陰行譎詭殆萬狀徑取歸神京辯才恍如失何異敕六丁
文皇好已甚丁寧殉昭陵當時馮趙輩臨寫賜公卿惟此
定武本謂出歐率更採擇獨稱善遂以鐫瑤瓊流傳殆五
季皆在御寢扃即律殘石晉睥睨不知名意必希世寶纒
裹載輜輶帝犯既北去棄與朽壤并久乃遇知者龕置太
守廳或云政宣間此石歸紹彭又言入內府宣取恐遠程
焚膏繼短晷拓本手不停疊紙至三四肥瘠遂異形南渡
愈難見得者輒相矜我見十數本對之心欲醒汪侯端明
子嗜古自弱齡錦囊荷傾倒快覩喜失聲帶流及古天往
往字不成而獨此全好護持如有靈兀王號博雅異論誰
與評硬黃極摹寫唐人若無稱實本滿東南瑣、不足呈
猶有裝與撫砭侯近璜珩右軍再三作已覺不稱情心摹
且手追安能效筆精響榻固近似形似神不清不如參其
意到手隨縱橫况我筆素拙何力望群英近亦得舊物庶
幾窺典刑此本更高勝著語安敢輕孤風邈難繼悵望冥
鴻征

送劉德修少卿潼川漕

清朝重諍臣選取妙一世矯、劉御史一鶚勝百鷲顧瞻
最有力步武亦嚴毅一生憂國心千古敢言氣、足元所
學文能行其意遇事輒奮發觸叩無頽忌乘驄行且止但
思補衮闕何暇為身計獨立當雷霆三進氣彌厲去魯固
遲、出畫豈濡滯上終行其言群賢爭挽致將輸向潼川
寓直尚書祕風裁仰清峻進退審難易伊昔聯周行睽違

千餘歲未為同舍郎愈篤金蘭契洗眼看騰上寧知攬征
袂抗章嘆高絕勇退尤知愧去勿窮日力予環日月冀承
君送道鄉硬語吁可畏毋以此自滿當為不止是臨別提
斯語少盡交朋誼萬里苟同心吳蜀安有異

次韻李季章監簿泛湖

仙舟共泛滄波去且向蘇公堤下住西風吹就芙蓉城青
鏡閑粧兩呈露皇家法崇儉素宸心但欲乘高輅離宮
別殿無興作天以西湖供一豫吾儕公退得清賞酒餞棊
枰不知暮深知夕照戀狎鷗又恐所朝追振鷺自憐三入
鳳凰城歲月黃塵等閑度湖光正欲捲簾看風色更煩褰
幕護孤山不見處士廬司馬空尋蘇小墓酒乾人醉歡有
餘聯騎還趨湧金路歸來棹倒渾不知睡覺燈前裊香霧
文人公子共冰玉曾為出遨揮妙句奴、借韻僅成章敢
詫尊前鸚鵡賦

送楊廷秀祕監汪東漕

平生楊誠齋可仰不可見去年人一書老韓忽同傳道山
故仙伯再上古文殿蓬萊幾清淺筆力愈雄健獨扶風雅
翰孰敢當白戰一官定一集流傳殆千卷拙工見大匠有
技不敢獻誰持研鬚篇徑掣岩下電誦之百寮上慙汗幾
被面公今欲何之江左去乘傳鼻間長栩栩、仕已忘欣怨
英、日暮雲薦紳極追戀挽公不得留觴豆紛祖餞惟應
三山高須公和江練君王念疇昔臨遣尤繾綣公乎遂來
歸密侍清閑燕坐寢淮南謀如彼雪見現從容處帷幄侵
疆歸古汴

送曾無玷寺丞守池陽

我朝衣冠盛名家數三曾南豐暨潁川後起參溫陵邇來
縲川族駸著簪纓春風雁塔中參差見姓名君才素穎
出健筆送縱橫江右兩壯縣談笑政已成河陽桃李花武
城絃歌聲入朝八九載去擁池陽旌羊家有舊好一見意
氣傾更因劉御史為君寫先銘去年叨省郎君亦轉為丞
中都但交謁名紙空毛生惟日候賓廡接膝傾交情分陰
猶可惜翻恐倒屣迎阿連幸為察庶幾多合并寧知成勇
退拂袖尋歸程秩滿素簡靜不足煩公行要當試盤錯才
刃新發矸似聞有劇部或已薦長卿君其少停驂有詔來
皇扃

劉望之國錄惠示文卷次韻為謝

吾聞三峽江湍流下無底吾聞岷峨山聳秀且千里坤維
氣淑靈所產多名士高文既鏗然特立亦卓爾久慕黃中
劉近有貢公喜亟從蜀士問人物定誰比少年負奇節論
事如翻水萬里見張胡義激非氣使賢閑遂為察八尺見
英偉諸君皆歛避相與推德齒惠我春容篇句法參子美
再誦平生言作者真近似戰國信徒勞秦貪不知止漢唐
取與守反覆皆造理藩鎮論加詳河朔紛鼎峙詞源既淵
深借博渺無從今使諸生教育均蒙被論議歸正平辭
辭章掃浮靡古人去已遠時分彼此君既挽之回續絃
頌鳳髓

餞李君亮著作守眉山分韻得翠字

天下大峨山雄秀盤厚地山雖不在眉所在擁空翠矯

三蘇公挹此淑靈氣文章垂日星照映益一古李侯起廣
漢射策叩丹陛褒然出群英東南謁名字來上著作庭行
入甘泉侍胡為把一麾西歸尋藥市吾聞此州俗秉法更
陳義厚德坐鎮之近古翻易治君家義槩堂活人百萬計
老親懷故山色養謹承志還家萬里餘赴鎮夕可至不作
題柱驕豈有畫繡班意班老萊衣人間真樂事忠孝無兩
心出處固一致他日上思君命駕當不俟此別諒非久毋
庸慘征袂

送張定叟尚書鎮襄陽

武部尚書張公出鎮襄陽士夫莫不惜其去昔
韓昌送鄭尚書詩韻必以耒字祝使成政而耒
歸疾去而願歸蓋人之至情也而公自受隆委
謂邊事非可趣辦願加久任庶有成績憂國而
不為身謀聞者壯之某嘗陪卽省餞別分韻得
壤字未能措辭繼又隨西蜀諸賢之後始得詳
聞奏請之言被酒夜歸亟述長韻

公家忠獻公勲名照穹壤南軒傳聖學後進斗山仰尚書
天分高百聞真朗、日坐四益堂濡染助涵養小出輒驚
世發譽自英蕩兩朝倚才必三接承睿獎堂、尹京手風
采漢張敞九街寢桴鼓終朝清訟鉅汙流化清溝開市鋤
巨駟鈴齋晝無人士友厚吾黨政成化自行談笑揮浩穰
皇家重閫寄拊髀勞注想頗收起禁中帝曰汝其往人多
惜公去地位切台兩惟公不擇地引義猶慨慷陔度更周
詢千里若尋丈再拜受臨遣因得進忠謹邊臣固多事備

禦當素講要須久其任百弊隨剗礪願假臣歲月表裏如
指掌人材固不乏第一戒欺固樸拙勝巧心好佞寧木彊
願求忠信士枉直謹誅賞更須寬轡策奏請應如響上問
卿何先安靜最為上上憂襄漢間吳楚久遮障公因論形
勢哀、到遜抗是時晉在洛武昌勢相向是為必爭地南
北謹提防今雖居上游事與古殊狀狂虜縱欲來無處可
傳餉况今三陲靜皇靈方遠暢與蜀相倚角國勢自增壯
尚期效尺寸才疎意非廣忠肝氣凜、秋旻足排蕩上喜
憂願寬趣行開玉帳捐金示優寵諭賜煩上相惟公最得
士離別俱惘、薦紳紛祖餞直欲傾家釀賦詩馮骨臆一
一成技癢家聲與國事負荷有餘量邊頭十萬兵公臨如
挾纊吾聞胡運窮群首欲爭長不戢將自焚前轍有 煬

當為不可勝有和謹母倡千載羊叔子制敵恢天網行將
友斯人山川固無恙備成撫機動應煩護諸將功高歸未
晚會見登弼亮他時名父子繼踵凌烟像

送鄭惠叔尚書守建寧

十五年前送別時道山持節向江西今年又見送公別大
夫擁麾鎮閩越向來惜別固已深今日摻袪尤動心尚書
自是第一人氣義相許披胸襟南宮五表平明入列辟傳
聞俱聳立 壽皇聖孝冠百王三復高文天為泣擢處竊
切寵數新果然百日掌絲綸拭圭修聘稱應變握節不撓
威殊鄰直上銀臺尤振職李藩氣槩時批敕 嗣皇銳意
新百度筆端真有回天力星辰聽履冠文昌急流勇退驚
朝行望之正欲試翊馮長孺寧肯薄淮陽孤拙自憐銷壯

三入脩門空負媿薦人不進終不已獨賴當時言有味
公在猶嘆一居州公去無為為王留公乎行歸佐天子肯
作管晏卑微休

送蘇壽甫少卿赴潼川漕

老坡送江直入海君今歸尋江之源外臺去鄉若不遠為
持使節臨潼川君家一在四海間單于一問驚胡塵歸來
便合上清禁胡為日念橫峨岷賢哉群從傳家風夕郎名
節在所宗諸君亦復載清德况今又似尚書公 壽皇念
舊久更深聖明親擢傳玉音君歸寧能及黔突定應召駟
來追尋清獻入蜀携一龜君今載鶴同之歸他時未免蕙
帳怨人在西清鶴自飛

分韻送孫從之司業使湖南得千字

夫君靜而敏人十已則千讀破萬卷書操筆思湧泉古事
與今事一、探本源蚤蜚場屋聲作吏志益堅竭來上清
班漢庭誰在先雍容行祕書史館躬槩鉛片言寤明主立
使登諫垣拳、憂國心傾倒十三篇司成天下選歸已志
浩然赤日送妻子襟被尋谿船諸生慕陽城款挽不得專
竟持湖南節衽袂何翩翩、憶昨忝同登于今三十年朝行
喜相會終恨非官聯請益殊未厭奴、起離筵始以長官
來、以繡衣還書生素安分豈問却與前第惟公輩流自
應留日邊德星聚南楚予環當如連事體有關係臨歧款
無言

送王恭父倉部知洋州

天清無雲秋氣明好風叢桂傳芳馨乃於此時送君行江

空日煖難為情蚤從爾川馳大名眉宇瑩徹春壺冰語輒
傾倒心地平大篇小篇韶鈞鳴 壽皇一見喜不勝璧水
道山照群英潼川題與遠有聲痛洗鹽筭疲民醒天子呼
來再登瀛典領著作承明庭絕域往陪蘓子卿馬上談笑
胡人驚歸來期君待西清胡為西去謀專城士友重嘆君
不鷹視此進退秋毫輕洋川風物天下稱文翁流詠人載
賡當時猶待群政成君今未到意已傾岢峨大翩秋江澄
圖史萬卷鷗與盟殘編斷軸恐飄零數輩裝潢手不停我
亦重来預影纓三日不見鄙吝生况此慘袪將長征欲挽
不留鴻冥、賜環勿憚萬里程江山多助筆縱橫黼蒞王
度扶中興

題范寬秋山小景

山高最難圖意足不在大尺楮渺千里長江浸橫翠人家
雜烟樹懂恍徒意會苟或森三尺便若俗子對此画格律
巖興寄獨超邁洗眼映窻明妙處乃不昧流泉見原委著
屋分向背推車度危橋指路向關隘輕舟最渺茫浦嶼如
有待山稜瘦露骨汀洲橫若帶木葉黃欲脫秋容儼然在
霜餘無片雲歷、數沙界搜尋目力疲款賦無可奈近山
才四寸萬象紛納芥款識無窮意從耳翠更天外

江西李君千能、和墨及畫梅良齋許以三奇而
詩非所長也

游藝無小大要知皆本原後人率意作終當媿前賢老潘
妙對膠法從玉局傳或假季心名空掃千燈烟補之貌梅
花疎瘦仍清妍折枝映月影真態得之天李君信雅尚二

者將求全諸公競稱許試之乃誠然江西有詩汾皎一俱
成篇茲事未易窺屬和尚加鞭

分韻送盧國華福建提刑得華字

盧侯場屋聲天馬騰渥洼殘膏沾後人竒芬吐天葩來踏
九陌塵去種河陽花向來再去國盛山建高牙平生長者
譽靜篤語不譁古井絕微波璞玉無纖瑕使星照蜀道惠
愛流三巴吏姦賴刮磨民瘼煩搔爬田里誦盧公兒童知
國華白首尚郎潛坐曹事如麻翩、擁軺車去、向合沙
朝行惜君去舉酒相邀遮共登獅子峯石巨臨哈呀却來
澄湖邊野梅訪萌芽老柳掃黃葉枯荷蠹寒砧棋枰戰文
楸醉帽歌烏紗伊昔送君行相去萬里賒荷君遠寄書得
得來東嘉一見又成別感念成咨嗟羨君徑褰帷往成不

得瓜先尋上水船何殊泛仙槎作粥喜奉竦上冢仍過家
此計正未踈所恨成天涯尚幾或留行船鼓毋庸槓

題老融画牛溪煙雨

暝煙吹雨冥、兩牛半渡深清京塵久汚中履頗思歸濯
吾纓

慧元畫寒林七賢

舊有唐人出游圖謂宋之問王維李白高適史
白岑參六人多畫七賢不知第七人為誰或云
是潘道遙然未見據病起坐攻媿齋元公忽作
寒林七賢相寄余方夢寐故山見之灑然戲作
數語謝之

群賢俱詩豪時代不同處安得寒林中聯鑿睇相語誰歎

創妙意臭味無今古吾聞顧陸輩寓意或如許桃李並芙蓉雪中蕉葉吐元師老駘淡墨掃風雨作此寄玫瑰歸興渺烟渚舊六今則七未知果誰與我款從之游詎敢廁儔侶画我往執鞭欣為李君御

李文綬和所贈老駘詩復次韻為謝

鄴侯挿架書最多筆力雄竒天所命萬人海中深閉門理窟搜尋到幽憂我詩無力如山謳形穢豈堪珠玉映時歸夢入故山曳杖松間記投暝日君佳句撩秋思便欲歸尋舊三徑兼足痺不良行况復炎蒸如釜甑夜來一雨洗河漢簷溜消清入聽晨興剝啄誰叩門乃有同聲喜相應讀之恍若濯清風自覺昏眸怯明鏡伊余何幸點班行結交往多名勝夫君平處顧清新解道澄江如練靜從今我乃得四友不特官梅動詩興推枕裁詩謝高致扶僊搖憂心靡定舊聞讀檄愈頭風今賴長篇起瘳病

次韻六和塔秀江亭壁間留題

江外參差別萬山我家深在萬山間好山正不用錢買但要未老身先閑長江比愁終似少江水能回愁不了扁舟何日過西陵鄮山佳處吾歸老

跋袁起岩所藏修楔序

悵望當時真蹟臨摹所在支分千載但稱合作誰能有感斯文

又

定本為古第一此又在定武前今日錦標玉軸向來不值一錢

送陳君舉舍人東歸

皇天生人物千載非偶然冲和兼萬人始得一美賢夫君
乃其人、一已百千飛黃欲追風况復勤著鞭文陣蚤奔
放氣欲摩青天短褐東海瀕名貫牛斗躔聞道更獨早自
言若隊淵出登龍虎榜徑上鷓鷯聯中間幾流落清湘窮
汴汭白首始為郎一見意已傳登瀛上麟臺授簡游兔園
擢為柱下史遂居紫薇垣去天真尺五朝綱賴扶顛龍樓
缺問寢萬口爭進言惟君竄勇决螭頭屢直前危言破人
膽三進加勤拳天高聽亦高歸袂何翩翩、高風激頽波同
列空慙顏君雖未必去一去勝九遷我欲留孔戔有懷不
得專况我自欲去何心挽歸船嗟我生何為與君幸齊年
先後才九日相與同氣然幾年苦契濶班心忽差痛判花
同代庖君恩如湧泉上房草數制下房時一篇一篇輒高
妙隗始愧余先春煠隱公傳國史建隆編周官授大旨所
得俱未全聚散不可料餞別滄江邊君將處於陵我耕綿
上田君行毋疾驅中途恐傳宣不然遂成別孤帆渺風烟
夢魂不可制隨君墮中川

次韻趙子野石城釣月圖

石城江頭可憐月曾照六朝清夜獵古往今來知幾何長
江哀、蕭、葉、謫仙去後詩盟寒王孫詩瘦清柔、詩情
浩蕩坐無奈扁舟笑把磻溪竿江平風輕波瑟、宿靄卷
空天一色東風吹向入長安一卷風流坐中得初得神意
清再讀曾次平回頭明月祇如故世上興廢徒紛更想君
一葉萬掀舞夜靜水寒誰與語船頭有酒且孤斟莫向金

陵重懷古

成溪道中

寒雲高于淅黃流濯西河人牛力俱壯相與衝流過潮落
勢巨禦轉權依丘阿暮靄起平楚陰雲翳寒沙夜分潮復
上櫓聲相軋摩大江渺無津不知身在何餘生一虛舟兀
然聽風波吾親白雲下况爾方臨病遠游非吾事歸矣母
蹉跎

哭表弟汪去偽墓

內弟幼而敏抗志歆決科一行試曹掾吏才猶患多謂當
為時用舌在如命何通籍已艱限入幕終蹉跎我生依外
家侵尋閱義娥視君如同氣竹馬聲相和少長聯研席詞
場深琢磨相期到晚歲杖履俱婆娑寧知五年別君隨東
逝波意同成溪行我馬君乘駕一費一千駕羸俊已倍過
重來意慘愴樹擁山峩我嗟君父與兄相望空山阿宿草
埋白壁寒風撼林柯沉吟痛疇昔有淚如懸河

次韻蔣德要三徑

居山或稱囚得閑乃賦謫我樂靜方退來作三徑客西山
致朝爽膏盲在泉石沉雷秋空淨萬里看一碧

吳參議達觀齋

君不見大鵬與鷲鳩自適俱是逍遙游又不見大椿視朝
菌一修一短終朝盡况乎秋毫為大泰山小莫壽殤子彭
為夭漆園老子超衆作立論雖奇定非矯鳧胫從短鶴胫
長蠻觸亦能成戰場譽堯非桀兩置之讀書博籩簋俱亡羊
世人顛倒名利途躋攀分寸爭鎔銖河伯猶驚北海苦井

蛙醜雞何足誅試同萬衆走城市躍馬徒行分貴賤却登
高處望塵中但見紛、如聚蟻暫高猶爾况真高神游八
表非矜豪寧能高舉去人吾勿以役、隨滔、是知達人
有大觀蝶夢為周聊自玩翛然無入不自得處若終身仕
若漫吳侯晚到東海濱飽諸古故無戚欣相逢一咲成莫
逆似知我亦箇中人

送姜子謙丞於潛

處則有超蓮出則將哦松眉宇無一塵出處皆雍容君看
妙蓮華本出汙泥中兩松痛歸澆下有簿書叢汙潔無二
致喧寂本亦同於潛今畿邑蜀道萬里通至今存古意民
風尚醇醲一邑既當問尤宜撫疲瘡藍田文最高後學仰
韓公彼言蓋有激昧者但稱工成案漫不省丞哉豈真聾

姜氏太嶽後夷門幕家風教子延名師列碑多儒宗宮墻
既開荒書種慶所種換桂馥枝修益見筆研功後生日加
勉衣鉢傳無窮君才有餘办壯哉氣方充功名此推輪勁
翻看摩空我歸幸同社棊酒時相從尊前不忍別吟愁夕
陽春我家老揚州五記有遺踪向來耕織圖 為頌溪翁

送從弟林韶尉東陽

阿連少也爽孤立生氣燄壯年淬詞鋒傾心事鉛槧膠庠
困糞鹽世科終穩占再興連桂堂爾祖真不忝况將尉東
白士友尚歌艷惟我愛子深老矣猶不厭固知為子喜頗
亦動吾念贈子當以言苦口當針砭此邑子舊游歷、數
行店棠陰見郎君遺老喜窺覘其民最服義情偽靡容掩
莫恃采棒威要使幕中塾子文多立就詞采更華贍吾聞

恃俊者塞門差反玷前賢最加謹臨用更重檢他時可待
取天庭得錦幘吾家有素風耳目久濡染毋庸慕豪舉助
廉先以儉酒酒更宜戒平地有深塹酣暢當有時勿習盃
漱灑將論毋過高斯言却防玷立節毋務竒躡等恐成僭
外物思過分檢身但多欠勿嫌一尉卑封清尚為僱仕途
固嶮嶮大要進以漸不須苦求知真知奏應剡向來湖海
豪四十可收歛寧為處囊雖莫作露刃劍勿、摻祛別魚
鮮酒方釀刮目待子歸固俾吾言驗

攻媿先生集卷第二

攻媿先生集卷第三

古詩

送制帥林和叔歸

使君一何清鶴骨天與瘦少年場屋聲六藝飽芳漱一行
起作吏所立已不苟立朝凜大節論事幾反雷發言必體
國平生無矯揉藜藿為不採風采照宇宙出入有本末眼
見凡三就來不為苟合薦召乃結綬去亦不好高三宿徐
出畫天官豈不貴陳義堅素守贛川嘗報政復來守鄞鄮
不求赫一名實出龔龔黃右情偽千萬端到眼輒空透撫民
過嬰兒閭里息爭聞奸胥及強使時用霹靂手人誦南山
判情通理亦完六邑俱帖靜稱贊不容口律身至嚴冷無
能掣吾肘吏事精且勤呼燭侵夜漏公退入家塾諸孫後

來秀吏卒不識面洛誦出窻牖幾年南塘路來往困僵仆
一朝平似掌行歌終老幼公心信如水古井波不皺榮觀
處超然軒冕亦何有翩、欲賦歸排雲屢騰奏廟論終不
許斯民方借寇上心重閔勞祠官向廬阜闔境極攀戀人
人懷杜母君看卧轍人誰能使奔走挽湏不得留百拜願
公壽老我幸同朝傾蓋已如舊聯事東西省交情久益厚
我歸公亦來門戶托雲覆黃堂間參語惟我甥與舅揚旌
鳴鼓吹賁此蓬華陋清談不及私翁歸况不受義命孰不
知踐履或差謬惟公見善明力行真耐久有時相與言心
同蘭苕臭摻袪寧忍別追送列觴豆公雖不好飲勉為飲
醇耐公去我亦隱莽水翻綵袖花溪渺何許望、幾雙堠
千里共月明懷人重搔首惟應折梅花臨風為三嗅

賦揚州伯父海檜

潛虬拔地經天矯騰拏勢出青雲表為問猶向此中蟠坐
閱春秋昏復曉團、圓蓋月輪平蠹、蒼叢衆星小枯槎
當面結生香外有霜皮細勻遶乃知造化有神巧散作膠
枝窮樹杪雖非直榦棟梁材怪、奇、樂幽窈獨秀海山
臨浩漾駭浪翻空雲縹渺茁芽自有甘露滋弄影幾經霜
月皎崢嶸老氣本天然後生矯揉何時了我家揚州真好
事買歸但覺千金少夜半有力歆負之護持和璧終歸趙
從來寫照無髣髴畫師歆快毫端掃解衣盤礴意慘澹卷
起生綃色徒愀我來青邊立寒峭自憐氣與秋天杳倚筇
一笑賓亦歡開尊相與傾濟醪謂當好此如好賢為君三
復緇衣篇時、來前看不足終待結屋平湖邊

跋綦北海扈從書事詩

晉陽既自有高共奉天豈可無宣公當時扶日滄海東尚
想健筆驅長風指揮諸將如奴童中興內相當推功斷碑
毋庸說詩工制藁具在鑿坡中

送萬耕道帥瓊管

黎山千仞摩蒼穹嶺、獨在大海中自從漢武置兩郡黎
人始與南州通歷、更革不勝計唐設五筦如邕容皇州
聲教久漸被事體全有中華風黎中生居不可近熟黎百
洞鑄疆封或從徐聞向南望一粟不見波吞空靈神至禱
如響答征帆飽掛輕飛鴻曉行不計幾多里彼岸往、夕
陽春流求大食更天表舶交海上俱朝宗勢須至此少休
息乘風徑集番禺東不然舶政不可為兩地雖遠休戚同

古今事變無定論難信指之與楊雄四州隅分各置守瓊
臺帥閩尤尊崇高牙大纛擁方伯鼓吹振響驚蛟龍漢家
威名兩伏波盧丁以來幾宗工衛公精爽尚如生妙語况
有玉局翁史君吏事素高了明若古鏡磨青銅叱馭行、
不作難平生惟仗信與忠布宣王靈萬里外益使向化來
蠻貊弟惟遐方習疎慢政化要當率直通務中能見越王
石自然心服今易從頑獷未率宜以漸勿示駭政先含容
平、之策用定遠下、之考書陽公吏民先長固安土尚
當摩撫如童蒙屬僚宦游豈得已士多失職悲途窮名分
卑尊不可紊更念何處不相逢官事既了與無間可使和
氣俱冲融鄉閭惜別情所鍾臨歧為傾琥珀濃手遮西日
念遠去欲留奈何鼓逢、願君穩度三合溜早歸入侍明

光宮

寄題高汝一少卿識山堂

廬山之高誰不識
欲識其真了難得
往來山中最親切
嶺為橫看峯是側
曾從彭蠡望山外
識得山南昧山北
山體如一本不動
人苦求之愈多惑
君今一堂據湓城
香爐五老皆嘉賓
莫問後前與向背
面目還君多識真
君今與山如故人
慎勿忽作白頭新
堂中燕坐靜且壽
君其于此知吾心

侍仲舅同諸表游山

來游大梅山
涉山知幾重
平行午似岡
俯瞰他山峰
一步一步高
勢欲凌虛空
左顧九地底
樓臺鳴鼓鐘
蓬萊反在下
直恐船引風
又疑海水竭
洞見馮夷宮
行一愈就順
故步尋苔封
十年舊主人
相對如夢中
清談虛閣上
坐到夕陽春
年來頗畏影
製寸慕冥鴻
入山非不深
猶有行人蹤
安得更深居
尚友荷衣翁
未問梅子熟
寧能噉青松
庶幾適吾心
餘生得從容

大梅山

此山名大梅
驅車入山麓
試問山中人
山名竟誰屬
禪家開道場
為說梅子熟
仙家指為巖
曾此隱梅福
或云古有梅
其大蔽山谷
至今二梅梁
靈音皆其族
他山抗驚湍
禹祠橫殿屋
三者尚誰愚
禪師有遺族
餘皆不可辨
安得究圖錄
但愛山又山
喬林間修竹

金莪漱石亭

溪聲真是廣長舌
歷劫譚空聲不絕
不知來自何處山

意傾東忘萬折我欲漱石向水濱無奈齒牙搖落頻夜半
寒聲到客枕只疑身是枕流人

寄題台州倅廳雲壑圖

頃年登臨赤城裏江遶城中萬家市治中寄我雲壑圖快
請新詩眼如洗回思歲月如星流念一飛空尋舊游披圖
哦詩想幽致直欲携節上山頭聞有於菟在岑蔚晚徑寒
鷗敢翔集幾年榛棘蔽巖巖一朝絕境從中出細路雖非
五逵康縈回自覺阻且長萬壑風煙開絕頂一丘曲折于
中藏老砂射日銀星烟梅峽含風襟袖冷千岩高下各異
狀如障如峯亦如嶺天景須憑意匠營山不在高僂則名
規模已定力未暇他時會有滕王亭風浪隔濶天垂幕安
得扣問親剥啄哦詩夢到故山川睡美不知鐘鼓傳

王原慶新遷居南堂以古風求寫恕齋二大字并

石刻次韻

三槐諸孫有奇士才高特未遇時爾作詩尤能備衆體短
章大篇仍雜擬解紛使掉三寸舌隨陸蘇張何足比鷓鴣
猶未離風塵蛟螭尚爾蟠泥滓平生曳裾向侯門豪傑聞
風親瞻企只今交游亦凋落凜一身嗟獨峙槐陰滿庭
渺何在久寓瀛壖成故里瀕湖小樓太孤露何殊玉川洛
城裏邇來深入作郊居高屋好山成二美未能拔劍斬樓
蘭幾欲袖椎推晉鄙便將拂袖武陵溪誰能著脚長安市
西門性急佩柔韋柳予氣高成曲几衡守全似歸柴桑茅
茨大勝居僦耳我詩非工字欲拙荷子愛忘剛見喜夜來
縱筆寫恕齋自笑黔驢技止此更求刻訪少作頗記醉

中曾諾唯舊書紛背費搜尋魚鱗未開塵事起呼卷送三
數軸僅可障風同故紙新詩鼎來亟予和顛字敢追張長
史不須更投苦海中一笑以還隨棄毀徑須携酒到南堂
朗詠白駒三四章

又次韻

投老歸稱前進士時與田夫相似爾淵明賦歸何敢望曼
容自免差可擬門前爵羅真可設老圃灌畦聊自比恕齋
空洞最相親笑談頗覺清無滓時、過我共御盃望、不
來予為企丈夫未遇困泥塗誰識鷲停兼鵠峙方期從容
結詩社相與浮湛向閭里一朝別我欲遠游欲入桃花源
洞裏為言半隱欲偕行二子風流真儷美向來早有四方
志行盡東南到邊鄙只今名利遂兩忘爭心無復於朝市
祇有哦詩興未闌連得新詩照塵几調高韻險不易和白
雪陽春驚俚耳年登六十鬢未班乘興一行差可喜宗盟
莫逆素相忘並轡笑談無彼此湖海豪氣儘收歛以恕名
齋几一唯奴、慘袪不得留卮酒未乾人欲起寄聲半隱
不容言空有語離書滿紙歸時賡和必盈箱寫盡山川詩
作史送子才歸深閉門莫問是非并譽毀但期遠歸亦升
堂西湖仍訪老知章

送鄭楚客司法之岳陽

先生作賦真八吟高處獨步無古今少從三山來四明一
群士子多青衿我嘗學事六七載膏馥沾白資之深竊名
文場掌帝制至今不敢忘指南英、二子俱秀爽遺以一
經無贏金長公奉母上巴陵念君遠去因論心見君詩編

筆雖敏三歎永見朱絃音海瀕熬波幸解組未知宦

誰勝負清新想歌唇僵卧一榻上
執熱難屈伸斐然申前盟余將踵後塵

史清翁次前韻覓酒以金川玉友一枕瓶西安酒
一斗送之次韻

社中日相從此意豈不真其初定要約深期往來頻今年
苦多故孤負四郊春清和到新秋其間足良辰而我獨抱
病未能會佳賓定又得玉友風味尤可人思與君痛飲款
招復逡巡忽焉得新酒亟遣徑入唇別有酒一斗併使君
意伸我雖不敢嘗為洗胸中塵

陳天成用東坡趙清獻高齋詩韻賦適齋次韻

二公晚辭軒冕勞兩齋莫辨適與高嘗登雲山仰清獻平
地著屋山周遭白頭日過適齋下釣游尚想隨兒曹方從
家舅與俱隱野鶴誰能鳴九臯加我數年未納綠解衣簪
紱甘同袍在間此事要識破差處不可容一毫潁川尉仙

賦長句數寸之管煩君搯欲追險韻總坡老詞鋒犀銳真
吹毛鬣家見詩勉續貂長松相倚慙青蒿我今無復望祿
仕不應招我更由教

送元衛弟赴長亭鹽場

阿連生向秀二親所甚愛仲兄勤拊養遇事輒加誨幹蠱
靜而辨曾次無卑隘今為職宰益官字臨渤澥母謂官為
小要使所居大母言才可了檢身到織芥門戶重衣冠
綿數代當以誠心求子親勿自懈亭民亦良民孰謂居
無賴官吏既擾之兼并責逋債熬波亦良苦樂歲色猶菜
輸益不得錢何以禁私賣所在積蠹以良法浸多害壞吾
間不無術更當審利害熟視不為謀空餐媿難蓋不應行
一切遽使絕稱貸富者能寡取倍息久仍在貧者庶少寬
邁

送從子沅宰鄖鄉

小阮幼鍾愛長乃遭百罹風木既深痛棣華更纏悲所賴
有吾子獨立守家規上有門戶託 倖孤與嫠怒為磨磨國
行泝江秋為期冬滂與夏漲漢水足險巖慘祛送子去風
帆不可羈城中楮為幣邑下尤可知定知公事少不必事
作為用智正惡鑿大道本自夷家無壯子弟宗族各天涯
幸有知己人方且把一麾四海皆兄弟官寮善待之眠食
謹調攝家務須自持俸薄用宜嗇無使實漏卮此別動深
念毋忘故鄉思一書抵萬金時寄賓鴻歸

送高仲遠赴滁倅

高氏在四明於今為清門貳卿道素高夫人德尤尊子弟
盡恂、夫君更春溫昔年奉慈親定省嚴晨昏今日當門
戶友愛深弟昆伉儷信緣合端良由性根門中有孤嫠極
意均撫存與我親兒女次第了嫁婚不可解於心肯自以
為息不言而躬行後生熟見聞諸郎已秀發穎異有佳孫
御評共歸重內外無間言公勤官業廣所至治不煩仙舟
何遽西行、佐侯藩環滁皆好山風月當平分醉翁與樂
全遺蹟今尚存况有賢史君易鎮方比轅公餘陪嘯咏相
映如瑶琨生來仕平進自此朱兩轡從兄今鼎貴釐禁蕪
掖垣君其繼英躅復收舊青氈老我得投閑頻年接清歡
同社摻君祛戀、傾離樽梅風吹溽暑祝君尚加餐

秋雨兀坐王原慶携孫吉父菊花倡和見過有分
遺之意次韻

五載杜門居海角無復翻堦賦紅藥自憐荒徑菊猶存夕
餐空待秋英落眼明喜見綠叢、始也抽苗今滿握扶筇
着意養孤芳荆棘旁連細開斫天香入骨徐吐芬中有秋
風非外鑠傳聞南堂有佳種願過屠門思大嚼頗亦有意
欲見之此意未容兒輩覺乃知便許移芳根不止園官共
小摘要知壽客來駢肩何用潭水求延年有時採之東籬
邊不覺南山在眼前淵明千載共同調老我此際方悠然
西風吹花日夜急散金坐看開田、兩詩先到衡門下思
向平臺尋戲馬從君九日去行樂莫為登高淚盈把

送王粹中教授入蜀

王粹中教授赴新蜀帥尚書黃公之招萬里有
行古調一篇贈別因誦所聞以求益雖然陳叙
不暇較工拙也

萬里四塞圍平陸大為閼中次為蜀我生東南未嘗到蜀
士從游聞頗熟自從襄陽上峻途高歎登天下臨谷女媧
大山塞空虛麻綫名堆千萬曲行人一升鹿頭關下瞰平
川如畫幅一員二百四十里一出萬緡民日感向來陝西
五路兵退守諸閼疆地促計臣權宜重增賦民力尚寬從
所歎邇來因仍七十年鬼不輸錢無兩粟民生哀哉不堪
命外若富饒中不足蓋梓尚有繁盛風變映窮民幾比屋
側耕危獲俱稅租飯多梯稗無嘉穀朝廷謀帥弄印久宣
諭尚書剖符竹尚書當今第一流翁壻相望冰映玉貽書

挽君為此行古人義槩非流俗君亦慨然挈家去慘袪未
免再三祝君行豈為溫飽計一舉高飛快鴻鵠丈夫生有
四方志登覽山川非碌碌頃為假吏到燕山未行先取山
經讀所至訪尋多得力中原至今在吾目北征西征昔有
賦何肯徒行空逐子西嘗因過峴首遐想羊公歎相沃
閼右放賣眼拔鏃表留卒使癰潰肉試推此意向前去到
處前人有遺躅五丁開山果何在賢皇籌邊言可覆劍門
石角皆北向雪領界天望身毒高皇將臺壇在漢中武侯
八陣留魚腹棧閣繩橋在稱嶮威茂渡笮耒夷族李冰離
峯如底柱大寧鹽泉若飛瀑四路尤多未見書買歸何止
三萬軸黃公次功蜀檇杙石湖居士吳船錄若宜預考經
行地却隨所見書之牘幕中便可資籌策遠業因茲增蘊

蓄又聞渡瀘不在瀘南在沉黎邛崃九折是君家世尤當
知藝祖按圖揮玉斧大渡河外等棄之本朝獨無南詔患
一語決定無敢違成都郡庠千白袍後來之秀日益奇周
公禮殿巋然在畫像盤石繼宓犧春秋真謁用舊樂想見
節奏并威儀談經約史各專門學問可以相發揮康節遺
書有傳者不涪師問窮精微先天僅得十二三聲音律呂
無由窺更有異聞多細事試因餘暇質所疑青城大向訪
仙迹普賢靈變窮峨眉街名碁盤路九達江號濯錦如汙
池古栢參天二千尺水滸鼎立三石犀藥有珂貝說尤詭
字書不見栢與禮金堂鸚鵡掃孤塔蒼溪橘柚五出栢嘉
陵梵像烏最巨閬州城南天下稀少陵入蜀往來久須行
萬里方知詩我慚寡聞言又拙君其更為加詢咨老我無
復為世用但當杜門待君歸、期未知果何時、寄尺楮
寬吾思

山行歸來喜栽竹

平生好看竹每見覺相與小大或踈密一、皆媚媼恨無
地可種所至造竹所近方關門徑得地尋丈許乞鄰裁百
箇參差正當戶天公有老眼惠以三日雨山行不厭泥但
喜竹無苦歸來報平安翠葉多楚、不妨來子猷奚必希
蔣詡何當遠扶踈歲寒與君侶

小溪道中

晚出城西門循牆過南徑境夏橋日沉輝沈店月成影納
、川路遙賒、水聲冷款枕擁衾稠樂此寒夜永

醉題魚屏

五千買得見屏風白魚相逐菰蒲中俊尾潑刺有生意
人未易分雌雄屏後諸孫更雍容
減、無數迷西東我雖非魚知魚樂、處未必魚知儂

范牛

人問吾何愛一牛范僊真筆信風流
繩牽雖如自放猶勝更著金籠頭

白醉

陶內翰清異錄首載開元時高太素隱商山起
六逍遙館各製一銘其三曰冬日初出銘曰折
膠隨指夢想炙背金籬騰空映簷白醉余愛其
言取以名閣陳進道示惠大篇次韻

處古難獨醒時作映簷醉年少足裘馬安知老夫味天梳
與日帽且免供酒事謫居幸三適得此更慙媿向來六道
遙特書見清異君家老希夷相求諒同氣曲身成直身朝
寒俄失記醉中知其天不飲乃同意書生暫竒温難語純
綿麗

贈范緯文秀才

括蒼范牛自題云中興道士范子泯異人也淳
熙間武昌羅端良史君遠可詩篇有贈畫牛
范秀才一詩愛玩不能去手時、誦之以寫云
亡之悲今十八年矣有范緯文叩門初談風鑿
旋及墨戲事自言視子泯為大父行羅史君贈
詩即其人也既試其說草數語畀之

中興道士以牛鳴淡墨百果尤著聲妙入神品仍有靈我

不識之欽其名曾得烏犍兩橫軸人有石榴才一幅武昌
使君舊寄詩未言秀才乃其族忽有緯文來歎門自言真
是當家孫口誦羅詩若翻水他詩歷、俱能言一見前畫
歎真蹟願得生綃奮吾筆為作來禽對石榴一掃橫枝生
意出我詩不工人已陳有詩豈復能動人為君一寫史君
語更求知已如羅君

送陳表道宰南豐

與君出西郊送子之南吁子為名父子才器真璠璣乃翁
老從臣循吏追兩都益公工擬人謂比王仲舒積善必餘
慶于公大門閭子能傳家學何止讀父書執喪真有聞孺
慕久不渝彈琴不成聲兩上何徐、文場尚得雋一跌重
歎吁通籍金閨中夷唐因少迂邑中有三魯聲名照堪輿

士夫向秀文比屋多為儒萬里此發軔曾中有全模將別
更求言老馬後問途乃翁同仕出親誼崇終初以規不以
訟不自知其愚民社非細事况此壯大區不飲第一策精
神長有餘以此奉塵刹以此當萬殊何官不可為禍福皆
在吾劇邑最為難謹畏可無虞試看悔吝者寔惟予之辜
民力久已困未免索稅租歛如古什一攻瑟難吹竽古
行今法自應知樂輸有弊勿遽革有姦勿亟鋤責已重以
周檢束到錙銖兩脚踏寔地處事隨精粗頑不在斯民猾
不在吏胥苟以明恕行久之寔交孚為善無近名寔着名
與俱飲啄信前寔富貴不容圖三年報政成明時其舍諸
老我亦無用親情肯自踈盡此一杯酒惘然慘子祛相依
忽成別加餐意何如

陳天成詩多和東坡韻茲因寄喜雨詩走筆謝之
一春垂、困多雨雖曰如膏反成苦自知潦後必成旱果
見晴天雨黃土連旬不雨已歎嗟滌、山川雲不吐未聞
鶉鳩鳴屋角但有蚊蠅爭振羽一梅亟望重梅 旱魃為
妖無術禦閒居憂國後雲霓夜、三星正當戶君王側身
嘆涼德雲漢之詩無愧古避殿減膳率以躬責已縱囚真
有補史君精禱盡誠意千里歸心稱杜母四郊神物招蠲
鉅所在疲民如手撫風伯在今誠可訟已聞石燕空中舞
時、小雨慰人心渴瓦流膏僅兒乳傳言望日當通濟老
巫已得靈神語霈然三日果應期靡神不舉誰為主河流
傾已復舊痕良苗喜見興南畝中宵愁念不成寐夢摩娑
便腹眠清午從今一飽便可望坻京行見曾孫庾陳侯忽
就春容篇徑遣長須入城府歎君健筆今已老不草勅書
招賢普坡翁相去已百年時出新詩追步武

六月十六夜觀月翌早紀所見成長謠

海雲湧立雙鐵山明月正在山中間初疑羨陂藍田出水
面又似長風吹度玉門關須臾雲過月愈上太虛點綴後
飛翻白衣蒼狗不足完千變萬態俱可觀忽焉橫卧如蒼
龍驪珠額下光團圓山河清影見歷、桂枝扶踈若可攀
夜深醉倒鷄鳴起光景不顯居塵寰長庚睍然朝曦發望
舒猶掛西林端我欲呼吸晶華駐朱顏左有金丹右玉丹
昔聞兩曜在天如磨蟻日行日止一度慳太陰行速朔必
會金餅旋復成弓彎八卦萬物盡閑擊歷古不已真跳丸
急景懍恍難控搏但見霞彩生瀾班老我已復卦氣闡學

道無成空自歎不如安坐委天順一聽運化更循環

它山堰

它山吾鄉絕境也屢游而不及賦近過其上賦前
四句而歸季夏鬱蒸午寂無事因足成篇寫罷
長哦遐想勝地寢覺風生兩腋汙垢俱清比之
陵陽冷語尤為避暑上策也

它山堰頭足竒觀百方雷一聲不斷誰把并州快剪刀平
剪波瀾成兩段四明山深水源遠衆壑會谿長漫汗滔天
狂潦不少留瀉入長江勢奔竄賢哉唐家王長官欲圖永
利輸長筭想得慘澹經營時下上山川應飽看四福千嶺
桐屬聯惟有茲山擁東岸遂於此地築橫埭截取衆流心
自斷斟酌利害不全取高下參差僅強半水大十分七八

江徐挹三分供溉灌支流潄一穿郡城脉絡貫通平且緩
旱時反此水亦足坐使千年忘旱暵無窮而祀報元功像
設森嚴人敢玩梅梁天矯有冥助大患於今尚能捍前輩
所作多神灵日月真成赤心貫後人小智或更易費盡工
夫隨破散河堙蓋後謀不集堤斷河傾流甚悍富民束手
人受殃仰望古人重興歎老木號風波湛碧畫屏俯仰丹
書煥更須積雨看驚湍濡足褰裳何足憚去家不遠時一
遊短艇垂綸流可亂八月儻有仙槎來便欲乘之泝天漢

林復之求僧陳君舉為寫山谷與俞清老詩而和
之次韻

掃墨氣何銳為德意何闡勸沮皆不可要惟心所安何必
收澄規強款加中冠余看飲光衣以次傳何難

送秦仲防制幹

秦郎相家子被服一寒士不味膏粱珍嗜書如嗜芟仕途
樂平進欲上行或止制使護瀛壖婉畫幕中試不避癡兒
譏但欲了官事君賢他可及好善無與比公餘仍進學訪
問無巨細片言苟有聞必欲窮根底一介有可觀窮閭必
躬履老我甘投閒衡門人所棄惟談君異時好來訪生死
淡交久而欲清談或移晷一朝語余別摻祛不容已向來
二三公頗亦同臭味去、群欲空今君又行矣欲歸投金
瀨尚眷涌東水結交多老蒼要路有知己青氈我家舊勉
旃吹上第先聽傳除書使我喜不寐別後未相忘母愛書
一紙

送蔣德常宰鄱陽

棊社頗寥落聚會多商參矧如夫君賢貴重雙南金豈可
無此君周旋相與深一別歸未久征鞍又駸、老我苦多
病別酒難重斟摻祛不可留贈言効規箴吾聞古番君甚
得江湖心官無崇與卑時無古與今古人乃能爾歛衽當
致欽我亦一丈夫母謂力難任未暇言偃歌肯彈宓賤琴
明恕加撫摩細故多親鄰臨固密吏易姦賦重民弗禁飛鷄
懷桑椹烹魚溉釜鬻此邦熟往來當有慰黎黔君能踐去
科朝行佇朋簪公餘昌遠業讀書松竹林故家未見書校
讎如向歆時、為尋訪歸來共書淫勿以三徑荒間作莊
烏吟勉哉赴功名莫待二毛侵數年儻加我寒盟尚能尋

題家藏二畫

一龍

老龍卧海沙覺來未欠伸珠光發海底闐然自有神畫龍
不畫全必雜烟與雲此龍未嘗動具見爪與鱗一龍望見
之爭心生怒嗔奮迅勇欲前便爾雲滿身不知出誰筆定
非塵中人若非親見之何由寫其真雲濤方洶湧恍若渺
無津為霖會有時正爾良苦心乃知青雲高不如寂寞濱
深虞或飛去十襲聊自珍

一虎

一虎弭耳行一虎立而頤猛鷲乃天資亦爾相媚媼媼媼
尚耽况復逢其怒吾聞宣城包今古稱獨步投老筆愈精
爪牙利可怖方其款畫時閉戶張綃素磨墨備丹彩飲酒
至斗許解衣恣盤薄手足平地踞顧盼或騰拏窺之真如
虎捉筆一揮成神全威不露此其真是歟為我振蓬戶藜

藿將不採何止說狐兔

送陳進道倅三山

陳侯少有場屋聲歲在壬午聯薦名晚年游安里居君
亦懷綬歸家庭齊年連烟更同社臭味相與如弟兄一朝
話別款遠去洗盞更酌歌渭城金沙樂土宜宦游或謂不
減洛與京平分風月信可樂人家弦誦幾連甍豈惟帥圃
賴閑決定知秋闈望陶成西都外司掌宗盟須君外共二
為之丞勿謂為丞但虛稱亨途要當自此升惟君儒雅聞
簪纓種學成久筆縱橫奧篇隱帙了如響清談扞屑四
傾詩筒來往附郵傳時出妙語人為驚梅花萬樹照山白
荔子百種輝空明九門雄尊盛官府三山森聳多地靈長
樂一志書不盡平生頗恨未經行煩君傑句為摹寫遠寄

使我心神清

送姜子謙倅鍾離

濠梁自古揚州域禹娶塗山城尚留鍾離雖嘗作楚縣子
男之國書春秋卑梁爭桑起吳釁陰陵失道除漢讎嬴秦
屬之九江郡典午置郡任愈優蕭梁尤重北齊鎮高齊又
為西楚州正觀割淮疆理失元和如水號石頭脩阻

書冊竒畫如之照譙樓溪山築堰誰與謀漫引童謠為
激溝役工沈鐵不勝計欲灌壽陽為廢丘霧昏三日水松
出一決空貽千古羞上格下格果何在西濠東濠猶並流
守邊在人不在險、阻如故事不侔元魏擁兵數十萬義
兵堅守竄其酋向來橫澗一失計據凜、重貽宵旰憂刺
史陽帶兩城使渦口兩城今在不君侯妙年筆為投名位

詐肯卑微休去科高挹更膺仕我抱壯志未足酬歆效金
城上方畧宦游直到窮邊頭三光五岳氣猶分故疆慨想
何時收邑事不足煩大手往訪古今資遠猷老我無用垂
多病為君相與數觥籌暮社冷落故人少况復臨風送行
舟看君徑赴功名會努力自取公與侯又聞魚臺在近境
誰知魚樂如莊周烽沉柝靜若多暇從容何惜觀游儵

送滿丞剡川

工部丞崑丘我生丁巳年比吾既逾冠再轉丞金困年齡
過半百奏子喊松軒親見動小物如彼少壯然受輸道行
費畧不取一錢飛糠至眯目猶恐勞勿宣汝壯有空行、
貳剡川地近既便親俸外有圭田惟當念爾祖奉職固不
虔邑無不當問事亦不得專退無為避事進勿至侵權莊

生才不才其間要求旃去年苦旱歉穀熟殊頗偏未知催
科時何取何當蠲二十七鄉民戶口富人烟去天曾不遠
媿惡易以傳大寧九十餘父母俱華顛况子勤幹盡豈不
深愛憐食祿湏盡瘁毋嘆我獨賢不應頻往來恃有檄可
公時、寄安書何殊在目前秋賦已復近公餘更加鞭金
疊喜接境一水通鄉船他才尚少病尚能勤擊鮮

送王知復宰建德

筮仕一何早字民一何遲歷、三十年中間多險巖宦途
祇平進分寸窮攀躋最後官曹監一蹴黃金閨低由能自
爰風鷁甘退飛寧為紅蓮幕社尋武陵谿親黨多勸止君
去勸不宜治家有賢媛應門委佳兒安居捨大廈列屋間
歌姬風霜登客路單車如鷄棲勇決有如此端是英雄姿

有志事竟成不後一年期明詔趣鷁班壯縣催瓜時贏得
為君子否泰相因依古郡足瀟灑年來困征追守宰俱賢
明斯民其庶幾杭葦款走別有足如繫維舉酒向西望離
愁滿天涯惟君才素高邑若不足為謂難易將至謂易後
難夫老我百念冷安能效良規猶記簿領初過庭聞舊詩
惟畏為寡過惟勤為功虧遺訓儼如在終身當誦之

題趙尊道渥洼圖

趙尊道制幹以龍眠渥洼圖示余、曰誤矣本
韓幹馬東坡外為賦詩考此龍眠所臨而以後
為前俾易之為詩坡詩于後而次其韻馬實十

六坡集詩云十四匹豈誤耶

良馬六十有四蹄騰驟進止紛不齊權奇個儻多不羈亦

有頽影成驕嘶或行或涉更相頽交頸相靡若相語画出
老杜沙苑行將軍弟子早有聲中聞名種鷄群鶴無復瘦
瘡烏暮啄當時五花可媒龍復日去盡烏呼風開元四十
萬匹馬俯仰興亡空見画龍眠妙手歎希韓莫遣鐵面閉
西看

題高麗行看子

高麗賈人有以韓幹馬十二疋質於鄉人者題
曰行看子接處黃綾上書韓幹馬表飾以綾尾
以精紙皆麗物也聞其懷金來取因命工臨寫
而歸之再用東坡韻書臨本之後

竹批雙耳風入蹄霜鬣剪作三花齊相隨西去皆良種撼
首勢竄迎風嘶丹青不減陸與頽麗人傳來驛通語裝為
橫軸看且行云是韓幹非虛聲圍人乘馬如乘鶴人馬相
語同呼啄中有二匹真游龍爬梳迥立綠楊風賈胡携金
贖此馬亟呼工人臨舊画我詩無 到三韓寫向新圖時
自看

跋李少陵修禊序

唐文王之賜韓王有崔潤甫之題為可放若李
重光撥鐙書斷然無能效之者其為真筆何疑
朱徐開皇之記則已見少裴之辨開元去正觀
未遠潤甫又職校定四部圖書以為最善本則
真善矣辨才之本既殉昭陵今去止以定武本
為第一又出歐陽率更所臨石本自應在墨蹟
之下則知此本信為冠絕蓋希代之賢也然考

之新舊唐史崔湜弟液滌及從兄淮並有文翰
居清要液至殿中侍御史液弟滌明皇用為秘
書監出入禁中後賜名澄如此則液為湜之親
弟而為秘書監者滌也又宰相在系表博陵安
平崔氏仁師相文宗高宗次子擢之子液吏
部員外郎第四子挹之子湜相中宗湜之弟
滌秘書監如此則液為湜之從弟又不為秘書
監傳之與表已自不同而滌之親筆乃爾以是
知作史與考古之難也因併述之仍賦長句以
副少裴好古之意

蘭亭修禊永和中群賢高會俱雍容右軍作序亦偶爾藁
草乃致傳無窮自言疑若有神助他日屢書終不同歷代

傳寶在秘府尤其甚者唐太宗當時搜取極心力模本一
一頒群公惟此真蹟最奇絕蕭梁開皇有遺踪親御奎文
賜元嘉龍蟠虎翥何其工辯才所取秘昭陵此本一洗凡
馬空崔家兄弟列清要誨子况復稱龜龍圖書四部資校
讎當時尚有正觀風自云此為最善本冰銜臣液題甚恭
李王深得撥鐙法筆力絕勁雄江東右軍以來皆沙筆名
勝異代如相從病餘扶憊行掃松李君携來為發蒙平生
多有舊墨本一見使我開心骨摩挲嘆息不自己至寶盍
入明光宮隱居懷寶正不惡異氣或能牛斗衝叩門有客
勿傾倒恐有御史來乘驄

攻媿文集卷第三

攻媿先生文集卷第四

古詩

趙資政建三層樓中層藏書

危樓傑立潭府雄
仰望驚瞿何穹窿
擎以八柱真良工
恍如木天移海東
扶欄三級橫復縱
八窓交映光玲瓏
更上一層迥不同
歷覽萬象俱空濛
東南太白金峨峯
兩山千疊青芙蓉
環遶不斷如屏風
平疇彌望禾芄芾
城郭市井聚螿蜂
煙樹高低知幾叢
澄湖一片磨青銅
潮來江漲銀在鎔
海市三垂屬提封
四山寬圍城在中
地平樓小望易窮
安得高卧陳元龍
麗譙公府難從容
二閣均在道佛宮
江山得助無遺蹤
眼前突兀忽此逢
主人幹國成棟隆
鼎彝久書柱石功
名遂身退茲明農
卜築深靜依高墉
百間

朗。羅心胃吐嗟不待鼙鼓鼙最後竒觀凌虛空窗戶未
須濕青紅似聞廬陵周益公亦作此樓高於松相望落
見兩翁心匠不謀如影從我欲效顰意方濃一朝登眺若
發矇不願侍公飲十鍾不願舞女紛歌僮插架三萬牙籤
重此身願為書蠹蟲不然相陪夕陽春與公憑欄送冥鴻
再題行看子

先引護欄毬子馳九馬近遠俱相從黑駒黃驢素駒亦
有當面仍銀駿夏國一種青於藍五明錯靴皆如龍或駮
或引恣馳驟坐覺隱耳聲瓏。人間安得有此輩一必
自天閑中不惟骨相異凡馬園人貴介多雍容三花翦鬣
自官樣空鞍更以香羅幪中間二者蓋天馬齒雖已老氣
尚雄不知幾出橫門道雙立柳下青陰濃擡韉捩頰刷背
瞥旋梳駿尾搖青風人。生意馬欲動態度曲盡各不同
韓生去我幾百年蒸色尚濕青與紅不知何時墮鷄林萬
里遠在東海東賈人携來得寓目一見絕歎丹青工千金
可買真不惜忽復携去何匆。亟令臨寫得形似如此神
駿那得逢開元內外馬盈億色別為群從登封韓生所見
定傑出七尺為駮八尺駮向來鶯邊繫金絨歸乘款段頭
已童伏櫪寧能志千里却笑區。據鞍矍鑠翁

寄吳漢英玩芳亭

吳侯奕一天分高歷記萬卷無差毫青雲垂上忽歸去年
來益收湖海豪志同三閭時則異玩此芳物亭之臯視彼
顯穎亦何苦鼻間栩栩忘鬱陶詩文滿軸寄海嶠靈均細
論無乃勞與君齊年况同袍祇今衡門沒蓬蒿有芳可玩

便自適草間野卉時一遭薤苳辛夷蘭杜若未暇一一追

離騷詩文皆以屈平異目為言

送孫子祥赴新昌主簿

高士不為簿子嚴論獨殊不遭何不可而况主簿乎夫君
豈其喬南明筮仕初要知官無卑祿可代耕鋤正須勿小
稽使民能樂輸矧復兼尉曹鼠竊隨除驅西職去民近亨
途此摧輿君誠吾里秀賢厚素有餘埋蛇有陰德映雪讀
古書起家決儒科鄉評足名譽妻以兄之子相與足相娛
小別不足惜未免慘子祛邑徑迷台剡好山環四隅一子
丞鄰封川陸通舟車乘輿或一往徑欲造庭除公餘想績
文尤當惜居諸會看興公賦擲地金聲如

送漳丞上虞

我老不復仕行將掛衣冠兩子俱貳令官職恰一般剡川
且書考上虞亦之官人言易捧檄歸奉重親歡我意正不
爾期汝政可觀食焉忘其事古訓戒捨饒汝職去民親簿

書

當細看一邑無不問正爾良獨難江海匝三垂長堤捍驚
湍埭高幾如山潮至不留殘宣和有遺跡能使潮浸灘陂
湖謹蓄洩可以救旱乾長溝濟漕運浚治令通寬此皆丞
所職勿憚心力殫江頭有東山永懷謝家安邑有李與豐
况復居二潘尚有更後游問學加研鑽平時固知汝廉謹
無欺謾涉世終未深送汝能忘言故鄉去帝鄉舟馭多往
還失已固不可待人亦多端固求違道譽善遣非意干窮
達自有時此理真如丹聚散不足較豈得長團團閑靜我
所便汝其自加食有時或乘興往來二子間踏雨送汝行

浮家當游般走筆如家書誰能苦雕剜

送伯中弟尉新喻

伯父盛德人伯中寔暮子不惟能象賢氣貌亦相似幼日
讀父書結字得皮髓粹然金玉姿少日期千里寧知游上
庠蹉跎困名第晚始着青衫酸寒就一尉歔然報瓜時往
成真樂事自惟群從希惜別不能已中年重離別况我衰
如此親故例作惡况復於吾弟茲行豈得休雅懷聊漫仕
勿憚三年留江南富山水尉曹官雖卑去民最密適一日
斯必葺職務毋少弛善保金石軀離觴且同醉歸來畢婚
嫁相從期暮齒教子以義方忍負授經史素業俱有傳見
進未見止大兒方決科如摘額豈耳子尚徐其驅中途聽
捷喜

送張子安分教澧陽

澧陽渺何許遠在天盡頭頃為郡樓記圖志不可求王侯
錄故實頗亦費真搜忠以申明著學有車公優外挹蘭江
水下俯僂明洲讀書記群玉採藥思浮丘况得子厚語謂
剋漢南州見謂頗詳盡豐碑照城隍可憐城與樓百姓不
知修乃知尚有遺家傳載鄴侯張君將客授蓋嘗叙其由
為我謝澧人聊以遮前羞君家古為儒青箱襲箕裘太玄
洵潛虛探賾深可鉤君才兼數器博洽誰與儔南廟推第
一鵬鷲快九秋得官愈嗜學手抄不能休館殿要人物衆
寶登琳瑯演綸及視草如君真勝流蘭芷主顏色暫煩為
遠游君方俟瓜時相依意綢繆樽酒接後客詩篇更唱酬
論文完今昔析理到孔周老我澹無伴摻袪不容留別乘

澹庵子傾蓋當相投公餘文字欲能思故人否

送周君可宰會稽

作邑誠匪易况子之稽山銀苗視兩朝家知其難鼎
數萬戶賦重民生艱山陵五雲飛拜護力更殫預買萬
畝法貪至於殘越久瘠已甚當饋幾發歎名臣為竭力減
額宜少寬不齊物之情茲事終難翻箕歛及鷄豚泥戶多
容姦竟來得要領條令何其煩通才善剗劇南康遂通班
誠心誠求之要使後可觀古仕不出鄉習俗皆素閑東嘉
嘗容授尋乃乘朱幡略如仕于鄉非意不得干况昔攝邑
久疾苦知民間故吏想猶在疲民知長官宜若差易耳未
免送以言權雖與正同事體終兩般起辦不計久為真事
多端遇事勿生風三思庶能安試登寬簡堂取我前碑看

六一真格言坐右當銘盤向來難奉母版輿今似潘外盡
撫字勞退公悅慈顏蓮峰聲望重待子興門闌勉哉發政
譽行美聞天闕

錢清王千里得王大令保母甄刻為賦長句

書家千載稱蘭亭蘭亭真蹟藏昭陵只今定本誇第一正
觀臨寫鑄瑤瓊黃閣岡下得寶墨古人燒甄堅於石大令
親書保母銘况是當時晉人刻甄雖破裂文多全妙畫遠
過蘭亭鑄其間曲水悲夫字駸欲度驂驢前我家阿連
縛虎手更得退堂方外友王君素出三槐家參坐會文真
耐久田丁初來獻小硯尋見津若微溜細看背刻晉獻
之永和彷彿在亭右亟訪田家叩所從始知墓崩隨意
大甄支床得前段掀倒浮屠金尾首字為十行、十二百

十有七二字漏交竒方壺不復見貞石推藏松亦朽我得
此碑喜不寐摩挲三款。未有興寧甲子十四周更閱三
年仍乙丑若非洞曉未來數安知八百餘年後坡翁應未
見此志金蟬之銘何絕人知類文章有暗合智謀所見略相
似二王遺蹤無所遺誰知地下此段竒三君共為成勝事
至寶呈露端有時越山盤屈獻與義付與耳孫守之煩
君更為護幽竈或恐意如猶有知

趙資政招賞川海棠次袁和升韻

少陵千古詩人傑每見名花輒題絕錦棠無如蜀川盛見
說千林天染纈大篇短章合無數忍對此花舌如結黃鵠
銜子萬里來春光頗向東南洩棹間老子携春歸鵲石營
林表高潔崇桃炫晝不足言紅艷燒林疑益烈棠梨小紅
自退聽不待騷人定優劣兩登蜀道歸海濱一琴一龜全
晚節嘉招容我到花下春酒新筍公自挈攀翻把插人共
醉十二金釵不成列表安參坐為長哦同氣相求磁石鐵
不須高燭映紅粧佳月自能明作哲紅潮滿類卧林間風
流誰敢來分別

泉口淨明院晝寢

沙頭古招提往來幾經行茲來當春晝解衣鳩西楹玉立
青琅玕小窗虛且明紙帳白如雪床軟枕更平偃仰四體
遙欠伸困思生酒更右脇臥徑入華胥城無人夢自覺閒
然四無聲林間婆餅焦悠一時一鳴翻身更從容意泰氣
亦清連朝走丘壘百拜不遑寧老我久倦游幸茲息營
哀相益已迫世念日愈輕自欣天與閒身是半髮僧未能

遂高隱庶幾保餘齡

賦蔣甥若水畜馬圖

何處驅來良馬六，駟黃參錯如花簇。胡為不作騰驤去，各有游韉繫前足。胡人下馬俱少休，倚氈裘眠正熟。酋豪揀箭奚奴撚，意欲時不遺。鏃琵琶橫倚續，一彈一夫坐聽胡中曲。臥擁提壺將引飲，英氣虬鬚皆貴族。沙磧坡陀高復低，天寒不見寸草綠。我行燕薊頗見之，狼帽烏靴乃其族。勿云恃勇不知義，要以赤心置其腹。嗚呼安得壯士健馬成，作使坐令戎馬皆臣僕。

陳表道惠米纜

平生所嗜惟湯餅，下箸輒空真雋永。年來風痺忌觸口，厭聞來力勅正愁。江西誰將米作纜，捲送銀絲光可鑑。仙禾為餅亞來年，細剪暴乾供健啗。如來螺髻一毛拔，卷然如蠶都人髮。新絃未上尚盤一，獨蠶長縲猶軋一。盱江珍品雅南豐，荷君來歸携來東。知君正直如羔羊，貽我素絲踰五紵。仙禾本出從嘉穀，色味俱同無餅毒。鼎深熟煮葱豉香，大羹元加臠肉。有時飯素苕，以齏饒口屬饜味更奇。束皙一賦不及此，為君却作補亡詩。

盧甥申之自吳門寄顏樂間畫牋

年來吳門箋色澤，勝西蜀春膏最宜書。葉一瑩栗玉賢甥更好奇，惠我小畫幅開緘。粲殷紅展玩光溢目，巧隨研光花傳色。濕丹綠桃杏春共媿，蘭桂秋始肅。趙昌工折枝，露華清可掬。妙手真似之，藏去不忍觸。苟非歐虞輩，誰敢當簡牘。又聞樂間君古篆，頗絕俗。併求數紙書，寄我慰幽獨。

題申之寄示春郊畫軸

郊原煦一春意足細草妻迷芳樹綠
鴈鷺無數泛陂塘牛羊相與隨
芻牧幾年不泛浙西船恍如蘓臺
俯平川閩人憂國無他策但願好
雨成豐年

六言問天池寶華

昔年曾賦虎丘猶恨靈巖未游
天池之景絕勝寶華有水倒流
老矣不復西去夢入陶朱偏舟
煩君為我尋訪能以新詩寄不

贈成都魯講書

悼字林獻

君家江發源我生瀛之壖相望萬里外
中間幾山川近聞令子敬文價驚鸞鶴
何由夢見之失喜瞻在前幅中尊英
標銜袖出文編倒屣平生歡劇談河漢
懸老我三入朝廣

識西蜀賢相與論諸公與君最周旋
自言隱太城讀書三十年城中竹谿居
肥遁遠市廛清溪擁屋後綠樹環前軒
一舟號橫雪可泝復可泐拂衣下三峽
非為名利牽灑灑追古作海潮賦新篇
舊依棹間公來乘角東船顧我何所取
有懷俱盡言老靚苦多病嘗藥異少痊
佳客不容留欲著歸川鞭間為惡草具
願君少留連服無錦綉段贈有朱絲絃
一別無復會慘祛意茫然蜀山渺何許
同聲惟杜鵑

趙資政當山堂

我公仁存心樂山心如丹平生經行處
不厭行路難青城及大白萬疊連百蠻
桐參仰脅息亦嘗坐長歎功成歸四明
得地數畝慳城隅路窮際小橋水汪瀾
蕭條魚家市中有屋百間危樓俯人壑
一看山四環堂深無他景城

當山城荒披綠莎青、透棹間秀潤。滿門坐對無躋攀
日夕氣亦佳鳥飛相與還終日有不厭徒倚十二欄有如
擁素華管窺見一斑况茲綠陰成連朝雨潺一濃翠真欲
滴秀色幾何餐我家但環堵窮耳困彎跽出門得曠望遙
碧羅烟鬢有時碧雲湧半空葦蒿顏須臾輒變滅欲駐良
亦艱美公得佳趣容我游其藩悠然時見之重門勿令闕

風琴

淵明有琴本無絃白傳偏喜聽人彈不如空中風度曲隨
風往來聲斷續非宮非商從君聽不中律呂無虧成大如
角韻來孤城細似蚓竅蒼蠅聲華亭夜鶴圓吭清顫動長
引寒蟬鳴或疑鳳唳叫霄漢又恐僊佩雲中行使其似曲
無別調安得自在聲冷、蛙喧尚謂勝鼓吹牛鳴猶以黃
鳴猶以黃鐘稱絲不如竹亦慢語賴此七竅俱瓏玲幽人
院靜新涼生八風不問來縱橫短簾六尺午睡足佛一神
來傳廣陵

寄題臨江徐秘閣儒榮堂

滄水海豹來京畿繫堯舜深惡之元祐政和能幾時女
真航海來乞師以燕伐燕夷攻夷吾國何與潛與期島夷
日張耶律卑城門失火殃池魚督亢雖入空無資免夫賦
及東南垂廟謨顛倒幾逆施中原丘墟責誰尸高皇匹馬
興漁濰南巡國步尤貼危神旌比指虜屢隳天雖悔禍庭
未犁西邦交聘玉節馳廿年不見紅旌旗狂胡窮凶不自
知意欲投蜚凌江涓安知送死燕城西倒戈勢如蟻潰隄
三年拜賜無能為再尋和議平瘡痍中間紀載紛是非顛

末不備多懷私痛定泣血作者誰僉言亂華疑傳疑徐君
憂世老不衰會梓衆作無焚絲東觀直筆多所資蓬萊漢
閣生光輝儒榮名堂本訓辭大書流詠見豐碑我昔假吏
陪琬圭故宮禾黍傷離一洪河大山望而悲壯士無數胡
馬肥謂國有人何至斯此心耿一淚自揮年運而往不可
追因君來覓儒榮詩感觸義槩并以詞無由縱覽讀書惟
願得版竹用激臣子無窮思

送表恭安赴江州節推

表氏四世凡五公唐朝三相傳家風君家幾代擅儒業高
曾藝苑俱稱雄大父謙尊古君子諸父名高表吾里一門
子弟更競賞挹取乙科自君始九江需吹今幾年去一淥
水依紅蓮忘年論交正相予叱馭款往難留連老我秋來

抱病久臨期無由置尊酒祇從臥內叙離懷戀一襟袪仍
握手鵬程萬里茲權輿平時義方師有餘送人以言古所
重雖誦所聞寧起予君看公孝與孟博太守坐嘯仍畫諾
一郡之政賴闕決千里應須念民瘼鄉州義事煩主盟纖
悉於余無隱情處事條理亦為政知君出仕當有聲尊公
亦入閩中幕公退著書端不惡君才更得江山助簡書既
省尋家學君行遠業未可量弟兄丹桂終齊芳老悖無庸
况多病尚能留眼看翱翔

趙南伸寄玉璞画猫犬戲為之賦

鬚鬚兩狡猥胡為到庭戶細觀画手妙摸寫真態度意足
謝繁筆不待丹青汙亂掃腹背毛頭足巧分布卷也如愁
胡眉攢眼光注豈惟足生羗垂耳紛敗絮掉尾固自若狸

奴為驚瞿側耳實畏之衝目尤敢怒誠知取形似不吠亦
不捕對之輒一咲聊用慰沈痼

朱李公寄詩有懷真率之集次韻

伊昔羊尹臨丹陽真率之名初濫觴香山尚蓋當會昌臥
雲不坐巖廊七人各列官與鄉年德俱高世所減丙午
同甲遙相望清談生風想琅、耆英人物尤軒昂賦詩遠
追白侍郎文富歸休壽而康衣冠十二何鏘、吾鄉五老
如雁行至今月旦尚推揚家舅仕宦接王楊眉壽遂及渭
水姜我如傷禽赴鸞凰忽驚騎箕歸銀潢向來雅約猶寶
藏菜羹草具烹蔬肪四皓中間有夏黃藹、義風誇白章
年來抱疴久在牀同社濶別如河梁君嘗遠宦踰沅湘又
向封川憇甘棠瘴雨蠻烟暗梳櫛何時歸安朝士坊忽傳
新詩凡生光歛衽正色而寒芒詩境幾成破天荒徐為續
貂未湏忙靜揣歸期應未央歸縱未衰亦老倉暮年甘與
子同裳何事相望天一方

吳少田惠詩百篇久未及謝又以委贖勉次來韻

江左一世稱名公首出劉惔與正濠自高日與天自况向
正數佞言高墉虛聲一傳實何在但知景附而風從我朝
諸公門戶濶普納萬象如虛空群才俱入大鑪鞴鑄人端
如金在鎔又如東君一布令白者自白紅自紅巖、千載
玉局老少年竟以吾道東首干樂全次六一二公自是燕
許宗奏篇六論初流傳四海一日俱承風其間傑出六君
子香薰班馬猶烏濃涪翁又分江西派作篇序次由本中
哦詩作文各務實薦鷄不媿北海融坐令文物掩前代主

盟豈非諸老功固知文氣僵湜籍亦許詩律沾徐江宛丘
諸黃接前輩宜有此甥風味同蚤嘗決勝翰墨場筆端豪
健誰爭工新篇句、多洒落妙畫字、真玲瓏惜哉生晚
百餘載歐蘓之門久登龍尚茲蹉跎未闊步吞舟之魚溝
豈容我方投老與在隔映窗愛景方矐矐十年屏居可羅
雀何人來顧一秃翁儼然衣冠見吾子文書銜褒名自通
向來兩卷餘百篇諷味至今未能窮更携大篇如拱壁刻
劃無益賁孤蹤人言霜蹄騁夷路我今秋隼凌三峯爰余
過厚擬前良此事如何着得儂老我不入杞梓林嶧陽深
隱如孤桐平生習氣掃欲盡只有媿處着力攻子歸求之
有餘師惟知歎息錦繡曾時、杖屨許來徃庶可歲寒相
始終

龍潭丈室一筍穿入露滿其上因賦之

一筍入屋照座寒凌晨巧有清露溥益信露珠自根起正
如真水朝泥丸廈屋不應為汝穿不肯屈節斜倚欄干霄
拱雲已在望且復自保青琅玕

早久無水王伯容分惠桃源大溪泉將以長篇水至
已雨走筆次韻

七十老翁門晝閉終日蕭然無一事却因不雨動哀懷擁
笏黃堂與祠祀兼旬旱涸舟不通井泉欲竭知無計僮奴
抱甕扣比隣水不得清僅無滓舊時見說桃谿源有水側
出萬竹前考之爾雅名沈泉頗思走介分微消去之一驛
不易到午暑坐想空垂涎不知何人剝琢扣我門惠以小
罌童稚驚相傳啟封一勺挹清泚烹試茗碗真增妍况當

精禱已孚應三日簷溜俱潺湲病中一笑成莞爾城闈安
有泉如此吳松四橋思陸羽白帝城西歌子美何用中濡
取楊子已覺清甘冰入齒前人所品殊不定一下一高隨
所喜老我住世能幾年引飲一瓢幾子淵行見甫田取十
千坐使遠近俱安然款和大篇不覺沉吟久擊鉢成章慙
敏手

送蕭宰富陽

富春富山水地勝雄三吳壯哉十萬戶幾邑行都大江
橫吾前上下萬賈趨吾子丞剡川攝事奸已鉏試縣力愈
難勉旃立規模治縣古有譜近頗多著書棹間愛汝厚誨
語皆良圖老我不惜別所望安官居汝亦頗練事正恐方
尚踈我以熱肺腸有求應所須遇事費十思一跌真不虞
雖當後心年競一矩不踰况汝年方壯勿恃才有餘據輪
始窺井任誕寧失拘三年待汝歸二親真倚閭

又送從子淮

二孫吾所愛別去殊關情阿剡將延賞伴子性亦靈煩子
善誘之他日使有成公餘松竹林共勉浴誦聲

寄題林宗山巢龜

彼澤之陂蒲與荷有美一人傷如何潔清如許豈不好紉
蘭綴蘿何足多七十二鑽無遺策不靈於已徒遭厄人生
何為千歲為願似巢蓮足清白

送趙仲禮守天台

棹間社稷臣卷藏經濟手功名付諸郎秀出諸公右大兒
倅東嘉洗印未云久次子鎮赤城急流去何驟二者皆為

親欲奉喬松壽况有戲彩堂可繼清獻後鄰封尤便養榮
侍各畫繡春風扇微和安輿雲出岫家傳吏師法從政於
何有還歸鴛鴦行金印當繫肘向來嘗佐郡山川若僚友
南渡多北客風味中都舊士夫喜公來紛然迎馬首其中
多故知頗問老夫否

贈相手文李道人

生有文在手縱橫殆天賦其間動成字往、傳自古舜夏
梁武 老十子貢五季友太叔虞仲子竟歸魯仲弓有釣
文宰我亦握戶敏士自文雅習道本因輔鄧淵彭神符瑣
瑣不足數李邵陶士衡三公皆定數白帝矜竒瑞見誚漢
古祖何為言禍福歷、如君語自言傳希夷妙處勝見取
見手知國封况此細文縷研油燎旃檀始見掌中虜何如
一覽頃坐談樂與苦老我縮袖間不復煩推步子其訪塵
中英傑在何許

跋余子壽所藏山谷書范孟博傳山谷晚在宜州或
求作字谷問欲何書則曰惟先生之意谷許以書
范孟博傳或謂南方無復書谷曰平時好讀此傳
遂嘿誦而書之舊聞此說又知在上饒大夫家願
見不可余子來入判慕博記善屬文偶談及此又
出摹本及尊公跋語始知其為先古舊物也為賦
長句

且人初謂宜於人 壯老人竟不振承天院記顧何罪一
斥致死海南濱賢哉別駕眷遷客不恤罪罟深相親衣、
不容處城闈夜遣二子從夫君一日携紙丐竒書引筆行

墨生烟雲南方無書可尋閱默寫此傳終全文補已三篋
比安去偶熟此卷非張巡巖汝南范孟博清裁千載無
比倫坡翁侍母曾啟問百謫九死氣自伸別駕去官公亦
已身雖既衰筆有神我聞此書久欲見摹本尚爾存其真
輟公清俸登堅珉可立懦夫羞佞臣

謝葉處士寫照

頃在朝行葉處士光遠為余寫照置於山林中欣
然自贊有云山林如許盍歸去蓋志於歸也一歸
十三年既掛冠再寄一圖為老人星狀形容變盡
非復故吾矣戲作長句謝之

老我舊曾官日邊隨衆年除仍歲遷母子日夜念鄉國但
欲共耕繇上田葉君寫照妙一曲畫我形模在山水有如
虎頭貌幼輿正合置之巖石裏猶記有客為諛言盍更野
服為貂蟬我笑不答心不然拂衣竟得歸林泉歸來歲月
不知久十餘年中何有此心烟一尚如丹只為幽憂成
老醜久矣與去俱相忘荷君念我應老蒼新圖白鬚添一
二豈知雙鬢皆成霜兩圖對掛耿相照顧眄從容成一笑
更添松竹作壽星我已甘心就枯槁人言姿態與真同如
照止水窺青銅明知已非故吾矣小孫指點能呼翁君居
天街號稱首侯王生面羅左右邊頭飛將能立功颯爽英
氣照窗牖名滿四方求者多千金造門君不呵能事固不
受促迫應酬雖煩可奈何胡為有暇及衰朽楚裝池意
尤厚我今已是行路人不須重累丹青手

送宣宗禹保寧軍掌書記

宣之為姓世所稀暇日試為君家推宋之宣公舍與夷子
孫相承此為基或云出自魯宣伯元和姓纂言則非西京
功臣偉與義侯封累世皆宗枝盛哉雲陽宣巨公光武稱
其勝二龔豐為司空懷在趙遙一久矣無元宗君家本自
大宗來世以儒術為家風尚及瞻識諸父行君家髫髻成
孤童艱難歷徧屹中立五行俱下攻時習自從一登賢士
庭貴名日起人誰及 選真似青銅錢一躍龍門浪三汲
吾鄉驚喜破天荒歸見朋儔愈謙挹寶婺古郡名浙東往
汎綠水依芙蓉如君入幕假途爾及之民事宜加工烹途
萬里才發輒搵袂勿使金樽空從今家聲當愈大坐使宣
氏崔盧同

攻媿先生文集卷第四

攻媿先生文集卷第五

律詩

試俞珣長頭筆

倦游俞老入中州霜兔抽毫飽盛秋平日相親管城子結
交今得賈長頭

訪留昭文子范村山間不得見

黃扉處士掩松關小立松風去住難可歎山中真宰相未
容神武掛衣冠

送倪正甫侍即使虜

經帷親見犯天顏口代何勞抗可汗故國應悲周黍稷遺
黎猶識漢衣冠殊隣謀報終難測累歲要盟恐易寒馳至
金城上方畧始知頗收在金盞

送王仲言添倅海陵二首

萬卷詩書老雪溪，頽然二子和埴。麓絕憐伯氏，久亡矣猶
幸夫君及見之。來上鷓行人，謂晚往舒驥。足自嫌遲，他時
還向雲門否。布襪青鞋，尚可期。

遂初陳迹遽淒涼，擊歎青箱極薦揚。談笑于儂情易厚，典
刑使我意差強。重屏舊畫論中主，古殿遺文話阿章。舊事
從今向誰得，尺書時許到淮鄉。

寄題延平范氏六桂堂

高門儒效許誰同，秀氣于今照演峯。家學一椿連五桂，地
靈兩劍化雙龍。三人衣鉢清名接，累世簪纓慶事重。彼茁
孫枝更林立，不須萬戶羨侯封。

京仲遠尚書為澹然子作二大字

濃墨新題付澹然，松坡為子老談天。憑君推我行年看，何
日歸耕繇上田。

送李伯和吏部提舉浙東伯珍寺丞將漕夔門

奕、君家好弟兄，皇華交映棣華明。幾年並列金闈彥，同
日俱持玉節行。萬里往臨夔子國，一江先到越王城。會聞
歸取青氈舊，都似當年老二卿。

送范文叔禮部守彭州

憂國髣先雪愛君心，似丹旌麾雖自遠。懷抱未全寬直道，
任三黜故人憐。一寒濠陽母久駐，旋復造鷓鸞。

送趙德老端明帥蜀

身名洪泰老尚書，叱馭寧辭萬里途。兩地恩榮真赫奕，四
川父老定歡呼。垂崖袍帶今重見，清獻琴龜我更無。頻向

籌邊樓上望歸來方畧上新圖

次盧國華提刑所寄韻

持節歸來上粉闈祇今一節又何之樂天好句追長慶元
亮高風挹義熙我恨別多成會少君雖去速豈來遲閩山
荔子燠晴晝莫惜登臨賸賦詩

古梅遺張時可

枝封蒼蘚澹花疎一種風流高更孤試問約齋三百樹林
中還有此枝無

李才翁賀涂天官次韻二首

九年奔走祇思閑歸夢時一墮故山已媿演綸詞禁上更
堪曳履侍臣間官曹顧我空無補去事惟君了不關但欲
相從游物外不應久此玷清班

我居銓部鬧簪裾終羨寒窓只蠹魚每念故交今有幾况
如盛德豈容踈京塵共嘆人老市道誰知有隱居久苦
筆端枯渴甚楚波正欲借君餘

劉德修右史去國示所和從父東谿及楊子直詩走

筆次韻三首

無人為辨樂羊書却向空山問草廬世上榮枯無定在眼
前毀譽竟何如寸心未徹九重上百口仍行萬里餘只恐
君王思舊學便看飛詔促嚴徐

東谿詩似老彌明傾蓋論詩絕點塵筆墨為供無盡藏江
湖乞得自由身出門遠送成惆悵無計相留更主臣但願
皇天開老眼不應空谷滯斯人

閣下相期久山中把酒稀未能容我去又復送君歸柱史

寧終隱威顏暫咫尺遠壯心誰與語看劍一燈微

謝表起岩侍郎送盆梔奉老母

翠綃飛蓋擁生香水雪精神試晚妝鶴髮慈親俄一笑玉人何事晚升堂

送曾南仲寺丞守永嘉

六和久坐趨歸鞭却送旌麾水竹邊無說可禪新令尹有詩重送老同年城隅綠竹今安否庭下朱纒定儼然回首東州真夢境羨君此去若登仙

過上虞懷謝驛喜雨

夢回簷溜作驚湍淨洗炎歊百慮寬咫尺東山見膏澤令人更憶謝家安

答錫杖平老

老我平生不願餘歸來但欲賦閑居灌園自足供朝膳且奉夫人御版輿

送涿尉海陵并寄示肅二首

二子俱從宦重親自足怡汝能行幼學吾豈恨輕離平日自知已真心更與誰臨文有遺志此是憶兒時處已幸寡過居官勿願餘動成經歲別賸寄幾行書公退仍多學心清任索居但知行所職通塞聽何如

次潘安升寄新谿詩韻

曾游明月舊雙谿老去情懷百不知夢繞新谿身不到更休重和寄來詩

送內弟汪強仲赴台州稅官

雕鞍去、不容攀柳下門墻輟往還可但征商私壟斷不

妨柱頰看中山右軍墨妙惟修禊太傅才高亦抱關只尺
親庭母苦戀有人能作這齋閑

少潛兄再立畫錦坊伯中弟有詩次其韻

東樓舊日史君家盛說于今說孟嘉畫錦門墻再興起烏
衣巷口倍輝華雖無崔氏聯三戟肯學楊家簇五花尤喜
桂枝香不斷歲書滿屋是生涯

王原慶訢盤殮蕭然走筆次韻二首

愁絕詩人太瘦生也無北食與南烹君看俚語亦堪吟何
日能填鼻下橫

莫嗜魚如先曹但應菜飯學參寥坡翁晚節更清苦正
糝新羹手自調

送趙振文主簿

去、江西不作難片帆雙槳蕩秋瀾已知宦業非時樣尤
喜情親耐歲寒志大自然羞附驥官卑何用歎棲鳶少卿
啣上加文度更仕年時剖眼看

病足戲效樂天

課得退連茹藥逢新太醫居閑幸餘暇養病任多時步履
雖非便調琴足自怡晚來風雨急高臥到晨炊

叔韻弟上連桂堂牌會群從

我家簪紱百餘年書種子今幸有傳折桂時能取黃牒肯
堂賴子挹青氈一新齋榜照華屋共集尊壘招衆賢須信
後生尤可畏要當爭着祖生鞭

題林氏香嚴庵

緩步尋佳處林深路欲迷偃松披數畝立竹漱三谿瀹茗

憑山檻呼燈照石梯輕輿空翠濕投暝喜幽棲

送汪強仲還官所

又向丹丘去安書易往還固應官事了莫放舊書閑問訊
雪巢老寄懷巾子山徑行皆夢境自幾日蒼顏

寄題吳紹古縣尉經德堂

問舍玉真下讀書經德中心期知共遠臭味許誰同吹笛
夜涼月舞雩春暮風直瀆涵泳熟毋負象山翁

玫瑰先生文集卷第五

玫瑰先生文集卷第六

律詩

送季舅汪江州太定二首

清直如公天自知晚年百順了無虧九城臺下方還旆五
老峯前又擁麾題坐喜無陳仲舉據牀好總庾元規太平
散吏無由到倚聽中和樂職詩

舅甥相與自垂髫游宦歸來鬢已凋坐上可無車武子酒
酣時賴蓋寬饒喜公自此驅千騎願我從今守一瓢間與
適齊同悵望草堂樽酒幸清朝

送內弟汪耐翁隨侍因赴臨川推官

之子長才盍要津未知此別幾經春且為濫浦過庭子往
作臨川入幕賓生長外家身已老周旋中表意尤親從今

家問須情實莫事虛文學外人

環村踏雪二首

一冬求雪雨還晴
晴賸喜春朝見玉霙
不為偶同佳客到
誰能深入亂山行
雲窗霧閣知何恨
玉樹瓊枝到處明
更喚輕舟同穩泛
小谿何似剡溪清
筍輿衝雪過溪橋
流水方東未晚潮
白裏不知梅奪色
青邊尤喜麥成苗
烟深帶雨參差下
空闊隨風自在飄
可是忍寒詩更切
故求野路踏瓊瑶

次蔣甥仲愚韻

山色空濛雪更奇
滿空擊碎琉璃寒
侵茅屋春無寐凍
合梅花夜不知
泛一輕舟勝路滑
洋一流水樂人飢
興來但覺酒腸濶
江海安能實漏卮

送元積弟赴永嘉酒官二首

宦遊五載住中川
似與邦人有夙緣
昔日江山知好在
舊游人物想依然
吾衰無復逢梅福
子去惟應夢阿連
或問故侯霜鬢未為言
潘令是齊年

我家清白世相傳
上詔真清更有年
百口未曾營活計
一生惟喜種心田
吾方奉母畊絲上
子更移封向酒泉
兄弟凋零期自勉
只將家訓作青氈

同王原慶知道游天童

舊遊曾記夢中身
一日重來白髮新
行盡杉松三十里
看來樓閣幾由旬
狎鷗亭外波瀾濶
宿鷺池邊草木春
自笑賦歸如此久
始來此地作閑人

東谷

舊說東柯谷茲來到此山樹深烟冉一花落雨潺一有客
禮師塔何人叩祖關天連秋水遠此意尚人間

千佛閣

平橫雲棟塞空虛倒影仍臨碧玉壺千佛威光歸寶所九
霄宸蒸粲河圖人天共歎未曾有燕雀相驚不敢踰試問
南詢童子看化城曾見此樓無

從子滌濯寒納涼

楊柳陰一映粉牆密雲藏雨晚來涼高荷欲出欄干上笑
挹

吸淨香

涿謁告歸省復還海陵

吾子遠歸省重闈俱粲然難留毛義檄又送子真仙西笑
仍千里東歸約二年詞場期自力收取舊青氈

題少潛兄得閑二首

亭下水吞空輕舟處一通閑情誰得似逸興更何窮詩社
率相過醉鄉時一中我家元不遠只在小橋東

平日君多暇如今我亦閑人歸真得地吏隱勝居山烟波
一千頃茅簷三四間天寒倚修竹空翠濕歌鬟

送從子淵宰浦江

誰云宦路足嶮嶽送子之官獨放心廉介有餘無矯亢謙
恭已甚自崇深安輿何用資三釜屢問時能抵萬金公退
讀書三子侍縣齋松竹已成林

慈谿道中

雙櫓真成鷺鶴鳴客愁厭苦夢魂驚須臾寢覺耳根熱一
覺醒來天已明

題惠崇着色四時景物

由說惠崇真畫師生綃四幅見天機鷺翻菴岸韶光嫵鷺
浴蓮塘暑氣微風勁賓鴻霜始肅寒欺花鴨雪初飛分明
知是丹青卷仍款沙頭喚

送具參議

才氣勇無前人推李子賢侯藩聯剖竹制幕晚依蓮勢利
從身外風流到酒邊四明欣會過兩載得周旋烏記題名
石仍吟達觀篇留行何及矣執別但茫然我已甘投老君
方欲引年未知重日目斷五湖船

即事

十日陰寒雪不成臘殘春近更霜晴深山高臥如春暖遠
鬢飛蚊自在鳴

弔陳衛道墓

平生學博更加詳和會三家儘較量一覺可憐成夢蝶多
岐終是易亡羊門前修竹連岩桂道上芙蓉間海棠何似
剗除閑草木青松一色蔭高岡

遊大梅山梅僊岩

為憶西京梅子真人言羽化匪沉淪海瀕古墓已無跡山
外高峯寧有神鯁論至今充漢傳清風猶足盪秋旻何須
更說神仙事終老市門良可人

虎冢

辛勤玉柙更珠襦或見义牙出骨頰鷲獸一心能護法故
惟千載尚全軀餘威凜、空埋骨遺象耽、若負嶠及見
當年梅子熟自應驚倒老奴狐

謝潘端叔惠紅梅有序

潘端叔惠紅梅一本全體皆江梅也香亦如之但色紅爾出自湖湘非他種比自此當為紅江梅以別之王文公蘓文忠石曼卿諸公有紅梅詩意其皆未見此種也感歎不足為賦二十絕

一

舊家桃李種河陽今日紅梅是楚湘根撥送春君意重為移絕艷到吾鄉

二

黃姑曾為點冰肌亦有緇塵染素衣何似胭脂天賜與暗香猶在是耶非

三

為君手種向南 誤認昌州移海棠元是玉妃生酒暈帳中仍帶返魂香

四

前身施粉忌太白今日施朱恐太紅說似商人剛不信清香萬斛在花中

五

殿後靸紅色漫穠絳紅空自咲春風何人擊碎珊瑚樹惱得嬌姬面發紅

六

舊見寒花蠟蒂紅寧知沁入雪膚中絕憐金谷佳人墜到地餘香散曉風

七

梅花幾種盡相聞
老矣才欣見此君
相與對花文字飲
絕勝歌舞醉紅裙

八

人間丹桂亦微黃
未見紅葩解有香
惟喜此花兼衆美
麝臍薰徹絳紗裳

九

初移湘水一枝春
賸馥還欣為我分
夢入山房三十樹
何時醉倒看紅雲

十

歲晚紅雲繞凍柯
玉人無那醉顏酡
廣平賦就如逢汝
鐵石心腸可奈何

十一

少陵年後詠花開
未見胭脂一抹腮
可惜當時詩興動
正因東閣看官梅

十二

坡翁着意賦三詩
謾說穠香已透肌
若見此花應絕倒
惜君生晚不逢時

十三

花品無庸定等差
國香國色屬吾家
海棠正自慙粗俗
莫問漫山桃李花

十四

不學江頭玉樹寒
壽陽紅粉舊妝殘
嬋娟可是慚隨俗
莫作金沙鎖骨看

十五

客來試與倚欄干，拂、清香觸鼻端。儘做北人，渾不識、不應改作杏花看。

十六

全體江梅臘裏芳，紫綿新拂漢宮妝。臨川借得江梅句，傾國天教抵死香。

十七

詩老為花空自忙，想應未識此奇芳。青枝綠葉何須辨，桃李安能如許香。

十八

只說梅花似雪飛，朱顏誰信暗香隨。不須添上徐熙畫，付與西湖別賦詩。

十九

縞帟練帨玉為肌，誰點微頰向此枝。若使羅虬見顏色，定須將此比紅兒。

二十

自昔梅花雪作團，紅梅晚不可人看。江梅不解追時好，祇守冰姿度歲寒。

山行

行入春山紫翠中，入山深處更桃紅。一百五日麥秋冷，二十四番花信風。千頃搖青幾蔽地，四山聳翠欲浮空。野橋橫跨溪如練，待買輕舟下釣筒。

金蹄

金蹄垂耳小鞞盧，飾以重環馴可呼。誰擊冬青碧陰下，恍然如見擊桐圖。

次吳伯華韻

一身遇坎復乘流景物當前亦自由
草淺人行回作徑水溪沙聚看成洲
哦詩首為鉤棘句適意即是逍遙遊
爛醉不知門外事夕陽日下西頭

從子灑送梅枝戲作

向來地暖見東嘉帶葉江梅殿
歲華不似青春三月暮南枝梅子北枝花

菁江送客

菁江十里路逶遲兩岸平時接翠微
贏得閣中乘畫舫隨潮西上趁潮歸

午睡聽雨

老年樂事莫如閑午睡醒來夢已闌
枕上欠伸猶懶起更

聽簷外雨珊

放鶴送潘恭叔司理

冲霄六翮困蓬蒿清唳時發九臯鳴
立固應能獨出鷄群未免歎徒勞
相投顧我憐冰玉欲去知君刷羽毛
幸脫樊籠隨所適平飛去不須高

宿育王山涵秋

清秋來此宿涵秋雨後山泉自在流
夜暗寒聲鏘玉佩燈明清影粲珠旒
枕流正自憐孫楚洗耳何須效許由
我亦暫來尋一壑倚欄耽玩不知休

長女涓歸夫家寄以小詩

胡笳未了遽成歸婦職如何敢失期
彈到佳聲重入塞伯喈未免念文姬

太湖響石

何處飛來一片雲太湖風急到江城雲中疑有群仙過時
聽了冬環佩聲

送朱季公倅嚴陵

朱家族裔中龍舒循吏清名史特書正為嗇夫思所部至
今廟食盛鄉閭舍人曾賦嚴公瀨季子方題仲舉輿但向
棠陰增蔽芾桐鄉今却在桐廬

以十月桃維松竹真筍中照以鏡屏用瀟韻

中有桃源天地寬杳然溪照武陵寒莫言洞府無由入試
向桃花背後看

次周益公韻有序

某比從朱南劍獲拜覩丞相益公送行玉章齒及

三

舅甥姓字既又得盡見詩刻文潞公同甲會之盛
壺所共聞公與王錢三府名丙午坊尤為奇事今
歐葛二賢士以布衣交五載與齊年之集壽樂未
央高風厚誼古未有也舅氏尚書既已屬和命某
同賦課成五首以謝厚意

天將間氣孕山川名世還當五百年已是有官居鼎鼐不
妨平地作神仙書林尚款校三豕筆力猶能驅兩肩前日
勲名身既退斯文留與後人傳

六一先生葛稚川兩孫俱並相君年詞場鏖戰今成夢潭
府齊盟望若仙致路三公舊同甲洛陽四老信差肩坊名
丙午真奇事又寫詩編盡並傳

頃嘗假守向中川公在黃扉已數年每念夔龍容接武自

期雞犬亦登仙入朝終歎一交臂問道幾思徧袒肩數仞
宮墻天樣遠此心何日遂親傳

別駕歸來自贛川相迎方歎別經年為言相國珠璣語寄
問祠庭山澤仙妙句聳觀親盟手滿城爭玩日駢肩退憐
母子方偕隱却恐虛名似此傳

舅甥相與老鄞川况值慈親九十年画舫時追唐賀監藍
輿聯訪漢梅仙官名自媿偶同轍才望如何敢並肩誤辱
品題稱酷似此聲梁楚更堪傳

題紀武子所藏老融二牛圖二首

佳哉淡墨掃人牛一笛橫風各自由平日溪知烏用稼如
今但欲老西疇

烏犍離立意透遲鞭策俱忘取次歸駸犢跳風却仍顧老

融于此露天機

謝少微兄惠牡丹三首

乍觀泉石分新種想為黥山憶舊葩病後不妨風韻在此
花之外更無花

方剪欄干第四花玉人聯袂過吾家拾紅玉翼皆名品醉
眼相看到月斜

簫鼓聲中醉九旬落紅萬點正愁人眼明忽見傾城色更
向尊前作好春

戲和漳詩卷四首

琴奕心偏好丹鉛手自磨哀翁會同社吾子揖餘波歌動
玉條脫酒傾金巨羅好為文字飲行樂未宜多

山色初染湖光鏡始磨竹梢輕墜兩花片亂隨波麈尾

揮東晉龍舟弔汨羅莫愁春易老暢飲一春多
澄江如練淨新月似鏤磨老柳飄輕絮良苗颭細波歌聲
追古郢詩價怯新羅到處還成醉芳醪旨且多
暮年甘散誕壯志久消磨自媿今摩詰誰憐老伏波清新
慙庾信敏慧謝甘羅惟有詩情在猶能益辨多

過從子澤家

楚、初篁脫綠苞城居約畧似荒郊土膏更得春風力直
引薔薇上竹梢

題陸放翁詩卷

妙畫初驚渴驥奔新詩熟讀歎微言四明知我豈相屬一
水思君誰與論茶灶筆牀懷甫里青鞋布襪想雲門何當
一棹訪深雪夜語同傾老瓦盆

送內弟汪莊仲赴浙西倉幕

家食八經秋茲烏喜宦遊往依王仲寶况事薛居州寄信
憑鴻羽題詩記虎丘雲飛親舍近時望海東頭

贈龍游術士胡呆

方笑劉郎問大鈞從來禍福本無門世間生老病死若時
至即行何足論

夜坐

晚涼徐步出柴^高廬萬變浮雲在窈冥濃似鍊山擎闕月薄
于春絮透踈星正欣夜久沉天籟尤喜空明鬱帝青雨氣
未平龍欲動電光前後射中庭

再送潘恭升

我似冥鴻弋猶慕君如放鶴去還歸秋空今日真成去好

伴閑雲自在飛

以六經左氏傳莊子遺伯中弟有詩來謝次韻二首
手披歆寃百家編奴婢年來識鄭玄願我幸多千卷富念
君未有一經全詩書心醉不容醒父子筆耕期有年此但
古人糟粕爾更須從此悟真筌

書種傳來直到今讀書幾似孝標淫欲君終就九經庫與
子平分一片心更向漆園窮妙旨何殊清廟奏遺音中郎
書籍付王粲想得知余此意深

中秋無月

涼意秋將半深期月影清昨宵雲點綴今夜雨縱橫睡久
何曾着更闌喜暫晴起來聊曠望終欠十分明

贈了相士

相形何似且論心眼力工夫見淺深古怪清竒任君說靈
臺一片若為尋

送林韶弟赴官錢清

叢爾錢清鎮茲行正為貧九夷猶可處十室豈無人官守
毋卑小城居緩卜隣老夫平日事所至若終身

淨明方丈

雲深宿雨未收晴短艇還來叩曉扃山溜擁谿侵石磴天
風吹霧暗空庭茵鋪野州濕新綠玉立修篁洗舊青老我
時、假僧榻夢魂真向醉中醒

新闢門徑或謂太窄

門外頓空曠雙眸太虛誰歎列佳樹正爾對吾廬蚤歲
曾修業衰年得居定買鄰賢伯仲衣錦舊門閭未辨三間

屋先栽數席蔬歡娛戲菜服晨夕奉潘輿駟馬容雖狹齋
即任有餘沐金知己盡餅粟豈無儲細草沿階嫩新篁得
雨初竊希仁者靜未覺故人踈晝永翻名画更長理舊書
何妨抱琴醉儘好帶經鉏耜同甘苦兒孫共卷舒眼花
多掩卷鬢雪不堪梳少飲毋求醉徐行可當車此生千萬
足祇願老樵漁

小谿道中二絕

簇、蒼山隱夕暉途看野鴈着行歸久之不動方知是一
搭碎雲寒不飛
後徧環村儘遡游鳳山寺下換輕舟一人努力雙篙急引
得清溪逆岸流

送從子淵莖

晨起霜如雪天寒水欲冰引舟拖急瀨扶杖歷危層北阮
苦多事二踈俄明山河埋白壁悲慟不能勝

早起戲作

枕穩衾溫夢不回間居不怕漏聲催天明更欲從容睡長
被孫兒惱覺來

午睡戲作

早起三朝當一工老來貪睡不相同偶然一次五更起却
用重眠到日中

攻媿先生文集卷第七

律詩

南山廣莫軒

廣莫垂風隘九州
亂山無數點平疇
一千里外在吾目
三十年来無此遊
地下天高俱歷歷
鳶飛魚躍兩悠悠
昌黎費盡南山句
曠望還能似此否

送趙至道節推

君來入幕却三年
我幸投閑識此賢
婉畫時、因事見素
風凜、信家傳
易林律本君須寄
月窟天根語是圓
問訊難兄無恙否
相忘千里各瀛壖

湖亭觀競渡

涵虔歌舞擁艷君
兩、龍舟來往頻
閨月風光三月景
二

分烟水八分人錦標贏得千人笑畫鼓敲殘一半春薄暮
遊船分散去尚餘簫管繞湖濱

龍潭方丈

又因寒食此中來窓戶虛明絕點埃山裏春風無間斷海
棠開過地棠開

弔僅老塔

僅老相從五十朞來瞻遺塔我心悲當時舊話無人說空
有門前洗鉢池

夜携家登南渡橋

幾過長橋下清宵得意行風高江水急月上海潮生空迥
寒逾峭更深境過清扁舟難久駐轉拖問歸程

題夢月上人送鴻小棧

雨洗春山空翠新登樓不見送鴻人薜蘿清夜月依舊無
復新詩泣鬼神

贈于湖劉相士

自笑今年卦氣闌壯心銷盡鬢毛殘明知七十無多子口
問何時可掛冠

五月望月蝕曆家又言六月朔日蝕

閨夜爭巷呼相傳救望舒偶見雲暫破真似月之初孰謂
蟄能瞎端知曆不踈太陽交蝕近試看更何如

題賀監李謫仙二像

不有風流賀季真更誰能識謫仙人金龜換酒今何在相
對畫圖如有神

斗酒澆詩動百篇鑑湖牛渚兩俱仙早知今日猶相對不

向稽山回酒船

病後戲作

河魚腹疾未全除一飯充饑不願餘縱有珍羞難下筋真成頓、食黃魚

枕上

不守庚申不坐禪老來觸事總悠然天明門外無來客儘好蕭、聽雨眠

謝蔣行之送菊

秋老懷情儘自寬眼前只欠菊花團分來三徑雙株秀先得重陽兩日看玉軟金輕無限態風高露冷不勝寒幽人相對成清伴止爾落英供夕餐

廳事落成老母置酒喜而成詩

數椽增葺苟全時我愛吾廬喜得歸兒輩粗能勤父蠱老夫元不費心機年來每媿踰初望病裏尤知悟昨非從此蕭然無一事但當日舞老莱衣

十月十七日夜

蟄蟲坯戶六經旬掣電驚雷若暮春震起昆蟲千百億不知何處更容身

織錦綦盤

錦城巧女費心機織就一枰如許齊彷彿回文仍具體縱橫方罫若分畦爛柯未易供仙客画紙何須倩老妻如款綦輕且稱當求白象與烏犀

升詔弟以退堂洪老詩來寄謝

不受人天供甘心樂隱居空窮千里目笑擁一樓書攻媿

老無用退堂閑有餘相望可航葦何日侍吾廬

寄題止卿通判可高亭

樟坡直上可高亭未見高亭祇見名想像豈能勝一覽登
高安得快雙明大龍湫下聽雷吼白石岩頭看日生咫尺
好山隨杖屨自應老筆擅詩聲

中秋次從子涪韻

雨餘不見日西沉將謂中秋又作陰佳月忽開千里影騷
人滿慰一年心掃除塵翳風難動滓穢太陰雲尚深坐待
寒光誰會此阿咸為我發微吟

楊花

杜門無緒看芳菲見說楊花滿路飛謝汝不隨人冷煖日
風翻舞到柴扉

送南題仲丞溧水

不用匆匆恨別離版輿春晝綠衣隨往題斯立藍田壁更
訪清真溧上詩公事毋庸持矛盾封真是和埧麓日哦
新句頻相寄明月清風慰所思

戲題龍眠馬性圖

狗子已知無佛性馬又何曾有性來伯樂若來休着眼任
他騏驎混駑駘

他山

素鏡橫臥作雷吼日射細鱗銀雪光安得此身如白鷺偷
然終日在梅梁
過盡水禽并野鳧風標惟許一春鉏可憐久立梅梁上不
為谿光祇鳥魚

小酌元衛弟聽雨

小閣臨流暑氣清
藕花的一照人明
移床更近欄邊坐
要聽棊聲雜雨聲

滿再往剡中念之尤念作詩寬之

剡縣不為遠
丞官勿謂卑
鼓盆知愛重
去國倍行遲
堂上森三克
房中秀一兒
加餐了官事
莫賦悼亡詩

觀雲寄蘭講師

蒼狗俄然又白衣
來從何處去何歸
無心出岫還歸去
莫向秋風說是非

過故家

團、桂樹擁簷牙
舊日輕黃滿樹花
惆悵秋清無一葉
空餘枯枿絕寒瓜

題從子浹娛親

阿戎築屋為娛親
野草閑花日一新
我奉版輿來舉酒
祈君親壽狄夫人

丹桂

碧雲步障紫金莖
風靜秋高千萬枝
嬌額塗黃元自好
是誰深傳蜜胭脂

下元日煖甚
夜風雨大作
早微雪從子
漵以醑醑來
眼明喜見早
醑醑窗外風
號集霰時
梅蕊已慚前
臘破芳心休
用怨春遲
納涼除夜
昨幾似見
雪芭蕉
今不疑若使
浴人真得此
應須更說
百宜枝

送朱升正守南劍

舍人簪筆舊甘泉
家學相傳子姓賢
未羨為太守阿

連剗竹向封川

樵李曾飛剗剗聲
貳車仍贊虎頭城
朱轡小試承流手
要繼桐鄉循吏名

萬竹蟠山咲不乾
雨龍潛水氣猶寒
郡齋見說真圖畫
公退何妨一倚闌

下水上山腰帶州
人家無數起危樓
遨頭不用喧簫鼓
祇把清詩紀勝遊

同盟東下或西征
老我惟知管送迎
祇恐政成登省戶
未容歸騎向西城

名画法書知幾編
俸錢寧復計求田
摩挲贖買新文字
歸滿米家書畫船

送杓孫隨侍上虜

阿斗生來十五年
未曾一日去翁前
閱詩勿廢家庭問
習吏仍求城旦篇
婚宦有涯真是幸
巾箱所蓄要相傳
榮壘雖小性非魯
口授詩書加愛憐

庭前一蓮著花

門外荷蓮後露芽
綠雲平地擁秋霞
病夫不耐出門去
且看庭前第一花

消月下鼓琴用漳韻

老穉團團鯉在庭
文姬為鼓玉琴聲
起來同作悲風曲
倍覺先秋月影清

國仲觀遷居尹隩訪別

晚年來定一枝巢
到處蓋頭一把茅
又欲浮家過尹隩
何殊樂道向莘郊
君今去此難招隱
老更從誰可定交
見說

衡門臨野水秋深客我告推敲

仲觀有詩來謝次韻

危機屢見劍頭炊喜及掛冠神武時從此含藏三寸舌
筆來揮得幾張匙讀書窓下病
小舟頻往反及今精力未全衰
攻媿庵中老任持速辦

謝玉粹中惠白鶴山麟川觀班竹杖并竹輿

麟川仙館翠琅玕荷子携來白鶴山未效葛坡龍種化絕
勝湘浦淚痕斑裁為拄杖一尋許巧作乘輿四尺慳
門生俱努力病夫欲過宛谿邊

攻媿先生文集卷第七

攻媿先生文集卷第八

律詩

曾無逸郎中名燕居曰和三續社有詩次韻欲和會
三家只續雙林

通天通地祇箇中千岐雖別大都同兩家偶爾流傳盛一
貫臨之內外融欲境掃開心在我浮雲散盡月當空感而
通者後來語不感須知自有通

老來

老來何以度光陰祇有圍碁與鼓琴碁為心勞踈對局琴
因臂弱倦調音曲肱時復同尼父面壁何妨學少林氣習
未除祇自咲又還動筆弄微吟

長生草

玻璃擢葉玉蟠根千里提携寄海濱
雨澤不需仍自潤土膏無著自長春
歲寒秀色真依舊日煖素英能一新
我欲餌之求久視恐君靈已不靈人

謝黃汝濟教授惠建茶并惠山泉

幾年不泛浙西船每憶林間訪惠泉
雅好誰如廣文老親携直到病夫前
細傾瓊液清如蕙更瀾雲菜味始全
或問此為真品否其中自有石如拳

史子仁碧沁

相家水有四明山更葺桃源漱菴間
四面樓臺相映發一川烟水自彎環
中川壘石勢差峩城上遙岑聳翠螺
舊說夕陽無限好此中贏得夕陽多

題趙晞遠二畫

添翻數尾已如生沙絕魚兒作隊行
不是深知濠上趣未應筆底得縱橫

右魚

窗前驚見一枝斜照眼英、十數花
千載簡齋仙去後何人更著好詩誇

右墨梅

送陳表道倅岳陽

垂上青雲去如何乘貳車輕為千里
別時寄幾行書刺劇才無滯傳家學
有餘當途足知己應不費吹噓聞說
巴陵好樓高占古城湖光千頃白
山色一煌明赤壁沉沙載蒼相老樹
精好詩收拾下寄我慰離情

元珍弟酌別賦此贈之

歸來十暑又三霜，衰病那知謁帝傍。
採菊初期老陶令種桃，應是突劉郎。
不辭白首登鰲夢，正欲青衫及鴈行。
今夕團圍同醉後，未知何日駕歸航。

靈芝寺

送客靈芝寺，凭欄山有無。
自從朝北闕，始得見西湖。
烟水移輕棹，波間落野鳧。
清寒不見駐，回首又神都。

閻立賢視脉曰老人之脉如小春有感

老去光陰如小春，如何比得少年人。
君看桃李春風後，縱有花開不是真。

貢闈對硯盤發嘆

老去未忘黃與朱，琢成三硯樂閒居。
豈能更作諸生業，但欲頻看後世書。
視草北門才已盡，持衡南省計尤疎。
便須再掛衣冠去，約汝同歸故草廬。

次韻李孟達使君與林雪巢子季武詩

古梅巨石瞰清池，觴詠曾陪老啟期。
副我遂成千古恨，傳家空有一編詩。
使君尚爾悲陳迹，處士惜非同此時。
若使南樓與清賞，胡床應奉庾元規。

玉堂早起

早起多奔走，旬休亦往還。
偶因二士試，始得一朝閒。
靈鷲花枝上，魚金荇蒂間。
素餐終有媿，只得舊家山。

贈徐松

我為浮名媿引年，老餘八十尚飄然。
不如合却談天口，歸向白雲深處眠。

經筵講詩徹章進詩

聖主承丕祚于今歲幾遷昭回光飾物剛健位乘乾善治
新更化當陽獨攬權誅鉏及共繇擢任列閎顛日方謀
始震心最急先未遑親政理首務闡經筵恭儉甘卑室尊
嚴拱細旃晝居勤已甚坐侍禮無前講徹詩三百時逢運
半千諸儒深誦說六義極摩研俯閱毛公傳旁叅鄭氏箋
慨尋中古意重是素王編舊本三千首終存十二篇雖遭
煨燼厄所賴詠歌全開迹司農事安民在井田成功時邁
酌興業大明綿宗國思平賦南山樂得賢艱難由后稷勞
來美周宣起自紹熙載迨茲嘉定年閔睢從肇被殷武遂
終為寵數傳中旨恩光被邇照神文期繼踵元祐信齊肩
內廐頌雲騎離鞍絢錦韉茗分龍焙品香拂御爐烟舞後
咸宣力孤生亦備員少時曾學詠老去未忘筌納祿誠休
矣歸耕久宴然鐸車俄促召梓里謂登仙詞禁容揮翰天
官命典銓豈知侵真境重得侍甘泉朽質何能報孱軀待
款捐尚思求譎諫海嶽效塵涓

題天竺珪老後庵

路從天竺更微南衲子邀余過後庵八法照人瞻睿蒸一
峯當戶擁晴嵐竒文初勒玩義畫並觀師老聃六用
不成均此理楞嚴容我為同參

為倪正父尚書題壯懷堂扁以詩來謝次韻

久矣君宜任弼諧旋隨驛召上天階幾年不作相逢夢一
日俄傾積別懷情願大君幾鮑林愚如老我顛高柴他時
戶冊高懸後直欲扁舟訪水涯

玫瑰先生文集卷第八

玫瑰先生文集卷第九

律詩

送趙德老觀文東歸

趣還宗老侍經筵宿望訐謨信偉然引疾屢煩頌漢制賦
歸先已買吳船去年趨召叨同傳今日求閒媿着鞭未得
相逢出關去羨公徒御若登仙
往還不過酒三行成敗同觀棊一枰東海敢言成二老西
湖自足度餘生竭耒便覺廢茲事歸去定須尋舊盟錦里
錦坊秋色裏夢魂先已到江城

送倪正父尚書守南徐

搜

君如春柳我如松晚歲重逢意愈通日一公餘理窟時
更暇樂談叢友朋罕有心相照兄弟惟應姓不同此別未

知何日見慘祛無語對西風

滿腔忠膜與嘉謨空洞他無一物餘有語真非憂國志欲
行猶上薦賢書已欣勇退成清節更喜高眠即故廬廊廟
須公經濟手不應歛惠向南徐

幾回去國向吳興出處雖高事不平茲以優恩臨北固不
妨禁直寓西清羨君決去行何速媿我求歸計未成滿水
東西又千里壯懷堂上未忘情

戲題十四絃

十四朱絃欲動時泛商流羽看瓊姬絃不隔如花面聲急
還同墮馬兒谿蟹霜餘縈密網簷蛛雨後理輕絲曲終勸
客杯無筭一吐空喉醉不知

樞密新府

平生苦欲住山間每恨家居不傍山游倦思來參宥密公
餘却得對孱顏椽槩萬壑自同響緩步一丘猶可攀信美
終非吾久處乞身惟待老鄉闈

門號簽書府心存攻媿齋倚欄臨曲沼扶杖看懸崖槁葉
鳴輕雨殘山擁半階退公成吏隱足以暢幽懷

大雪趙振文寄詩言來月泛舟清甚次韻

老我心知筆力衰頗欣臘雪瑞清時三茅竒觀亦難過白
玉峰頭燈萬枝

萬玉真妃挂佩琚梁園授簡屬相如莫嫌一水限吳越兩
岸交輝合太虛

雪光絕勝水銀、未竟仙家隔一塵真境宜君著佳句賞
心樂事更良辰

見說中宵泛綵舟何人同賞大江流陽水白雪應為伴更約禪人白道猷

舊聞老具擅詩聲夜汎錢塘向鳳城今日清游更豪逸雪

花和月帶潮生法具字圓復紹興初詩僧也有月夜游錢

相射後復云白下金陵四百年無此豪逸

酒邊戲作

未年六十已言歸七十重來自覺痴未報君恩歸未許樽

前羞聽摸魚兒

葉處士画貂蟬喜容見惠

重煩妙手費丹鉛貌出衰容信宛然君看頭顱已如許豈

堪頭上著貂蟬

頃游龍井得一聯王伯齊同兒輩游因足成之

路入風篁上翠微老龍蟠井四山圍水真綠淨不可唾又

不知何來魚若空行無所依勝處雖多終莫及舊游誰在

事皆非祇今匏繫何由到徒羨聯鑣帶月歸

海潮圖

錢塘佳月照青霄壯觀仍看半夜潮每恨形容無健筆誰

知收拾在生綃蕩搖直恐三山沒咫尺真成萬里遙金闕

岩堯天尺五海王自合日來朝

題施武子所藏醉白堂記有序

醉白堂記相臺舊刻已不多見施武子得太清樓

所藏真蹟一代奇寶也魏王尚友香山坡翁詞翰

兩絕畫錦故居昔嘗以假吏過其門巷恨不一到

其處太清圖書流傳至此撫卷無非可歎者事至

今日歎又不足為之慟哭可也

堂名醉白尚存不詞翰輝光射西畔天下曾除蘇氏學禁
中却有太清樓舊碑于在已難見真蹟惟君乃得收感歎
不堪哀淚落林慮山下水空流魏王以相州城中無水于
林慮山引水入城貫第中
溢為灌
溉之利

戲作

二子為丞分越邑女兒隨壻過江南笑言屋裏成岑寂正
似當初只在庵

諸壻拜掃晚歸長汀

雨意早垂、寒雲晚更低空中時散點道上不成泥綠柳
疏相映黃花麥與齊迂回餘百里喜見舊松堤

送朱季公守封川

韶陽生長十餘年城郭重經固宛然歎息紫微仙去後尚
餘遺墨照山川年見舍人君韶十四
壬戌

桐鄉漢有大司農封守今推陳秀公君向邦人著遺愛近

追相業遠家風陳秀州曾守
封川有惠愛

鄉評久說鴈行賢剖竹封川與劍川不用對牀風雨約政
成問取舊青氈

吾鄉慕社漫凋零賴有朱家好弟兄舉酒看、故人少陽
闋莫唱斷腸聲

妙舞清歌有二妹後堂曾見繡羅襦嶺南太守風流勝不
用歸舟載綠珠

以玉蘭贈王習父

一種香蘭玉色新仙家分得葉宮春調高韻勝誰能稱付

與能言解語人

華屋翬飛慶事綿
芝蘭玉樹喜庭前
似聞楚畹芽初出
便看藍田生晚烟

送趙青臣宰姚江

玉立君家好弟兄
藍田風采照花城
版輿壽母人間盛
千里何曾去送迎

鄞江水與姚江通
久矣盛名滿一同
試問何時到封部
數聲柔櫓一帆風

長江東去跨虹橋
千丈橫隄捍海潮
更向燭谿圖永利
坐令百里沸歌謠
才办恢、妙撥煩隣封
撫字尚何難
更能觸事加長慮
自有甘棠向後看

歸家故步懶重尋
藏拙年來恐不深
短棹有時乘興去
徑登竹所聽鳴琴

楊花

雨壓輕寒春較遲
春深不見柳綿飛
忽然飛入閑庭院
疑是故人何處歸

柳綿無數糝枝頭
日暖隨風撲画樓
萬象可觀惟有雪
喜看晴晝滿空游
為我輕攀綠柳枝
帶花低護又携歸
日長深院微風動
要着鬆綿當面飛

野芳庭草是生涯
老去祇宜閑在家
幾日惜春留不住
小鬟為我拾楊花

送王伯奮守筠陽

三槐名德萃清門七葉為州賴有君道院無忘山谷賦郡
齋當繼穎濱文君應膝上憐文度我向東床憶右軍振起
家聲差易耳便看奏寂躡青雲

別王恭升

兩兒雖近隔江潮賴有王郎慰寂寥遠侍雙親官道院為
同室餞西橋腦脂遮眼寂闌念客路尋仙勿憚遙別後
飛緘問安否數來谷口訪山樵

別長女清

老我年來百念輕文姬助我以琴鳴等閑相對成三弄游
戲俱彈似一聲舉酒不提千里別登途知用幾程行郡齋
自是神仙窟會有堦庭玉樹生

趙資政園梅篆

小徑回環里許長寒梅森列間疎篁路如古繭縈繆篆身
似輕烟繚印香九折坂中經蜀險八盤嶺上趁朝忙歸來
游戲通幽處笑看危途幾太行

示後子

東院敲碁西院琴固知猶勝別勞心少年不比老痴升且
向書窓惜寸陰

贈宣梅呂生

西湖處士賦疎影未似希貞好樂章豈是無情甘淡泊受
他風月幾淒涼

蒲自剡川寄水晶蒲萄

馬乳從他堆滿盤未如清嚼水晶寒固知一縣蒲留熟不
用勞人數問安

送汪莊仲赴江東倉幕彊仲荆門簽判

不見適齊老子今三四秋弟兄登官路親黨駐行舟老病
無詩思哀懷重別愁外家門戶盛勉力紹箕裘

外氏蒙恩厚文昌獨我知居慙酷似舅喜有寧馨兒遇事
行方便提身謹護持公餘定多暇黃卷有餘師

蚤歲過秋浦貪程不入關君今參儉幕特得上齊山膚使
賢閑決美擬伴宴閑好音頻寄我 此一開顏

之子游何許平州更玉州山川稱勝絕幕府信風流翠巘
寒逾秀金蓮夜不收天涯念鄉國少上仲宣樓

見說荆門地如門蔽楚荆舊時為內郡今日號邊城但守
平、策毋求赫、名勉於閑決際從此振家聲

送元積弟赴淮東總屬

南徐來往飽經過總餉賓寮入禮羅子去幸陪鄒湛輩君
今還是伯 金閨通籍時方可鐵甕名城景最多我有
淨名遺記在試從萬井訪維摩

十人兄弟五人存心事方欣得細論可但哀遲憐遠別祇
因喜懼有慈尊倚門何止期吾子發策還知望好孫從此
三年風雨夜寐寐棋局與清樽

陳君舉既已汪文子携其所作春秋後傳及送行詩

來次韻

名盛望尤脩枝披實亦繁無由究賢業猶幸立斯言書在
經綸顯人已道更尊九京如可作與子共南轅

送趙伯藏添倅永嘉

當代擇簡老吏師佳兒官業具而微已煩潘令宰花縣止

要王祥康海沂得助江山詩興逸平分風月雨鷗揮安車
何日迎清獻又向堂前戲綵衣

分教分符恰五年異鄉幾若故鄉然歸來幾作池塘夢送
別欲隨騶御仙目斷甘林應飽熟手裁 寔想芳鮮和若
問老州牧為說清霜繞鬢邊

晝寢

彈徹悲風更廣陵滄浪一為濯塵纓却卸枕上夢初覺喜
聽簷間雨聲

喚仙閣

上到危層莫喚仙祇憑橫檻挹江天江天如許來供眼何
用玉喬更偓佺
多少尋仙更不還渺茫竟墮有無間使其真有無庸喚仙

自曾城我自山

犯暑來登覽松風為洒然龍泉登古井虹影臥中川萬簇
寒林秀四山秋色鮮詩翁不可見况敢喚飛仙

送趙晦之丞彭澤

淮甸歸來涉學深孤雲又出亦何心公餘岩下讀書去遠
縱風流石橘林

淵明事晉恥臣劉仁傑忠良不附周見說三賢參 士尉

光 盍將吳簿配蘋羞南唐吳舉為彭澤主簿有高節見六一集

陶令居官八十日始為督郵方賦歸君家門戶要興起未
聞飄然咏式微

阿虞試醉戲作

阿虞匍匐醉盤中事一都拏要學翁最是傳家清白處不

將手向頑銅

贈別盧甥申之歸吳門

千里何妨命駕來
晤言未厭已西馳
子休重賦瓊瑰贈我
亦懶歌親戚離好
向清江論樂府更從
葉子說新詩樂間
引紙三十尺為篆離
騷繼李斯

又謝申之示詩卷

不見賢甥十一年
新詩示我百餘篇
古風已喜能行意
近體尤欣細屬聯
宅相真成珠在側
冷官休歎坐無氈
作詩勿謂今餘事
更下工夫繼玉川

攻媿先生文集卷第九

攻媿先生文集卷第十

律詩

送秦仲防通判

清德曾瞻啟慶碑
孫曾清更畏人知
祇緣一介弗輕取
坐使斯民不忍欺
瀨水家傳御書卦
宣城手寫逕行詩
典型尚繼金臺舊
馬氏一門誰白眉
題輿再到海東涯
嗜學深于入幕時
一字未通終不置
五行俱下尚嫌遲
情親端有卜隣意
別後空勞望月思
老我無司可重見
祝君來此擁旌麾

謝剡中沈元龍惠詩

東陽何事到東州
百語曾無一語酬
深羨松筠無改葉
自言蒲柳已先秋
千金既覺成虛擲
雙璧還驚又暗投
別後

未知何日見但將吾道付滄州

謝舒景叔寫照見贈

誰寫衰容入畫圖本來面目舊形模幾年老瘦鬢如雪不道今吾非故吾

謝雷季仲樞密惠餅社

寵分餅卷荷深情割肉烹鮮不厭精潭府始知嚴社祭哀門又得說侯鯖洗杯用薦遂巡酒下箸如餐谷董羨回首杉榆未能去欲隨秋燕問歸程

婁彥發參政壽詩

八月二十一日有序

某伏承生申之旦正得秋而萬寶成真是一年好處中秋佳月浙江大潮皆每歲所有芙蓉菊桂俱不復重陳今則實惟岩壑所誇一百齊歲之時况

值合宮大禮儲君受冊前星誕育昴宿凝祥相去只五日間賓僚惟公為舊學都省後堂祝壽之儀久不講此公首當之今人以慶朝按試鼓吹嚴更警場輒成唐律發樽前一釀

青宮冊寶盛朝章玉佩珠旒照日光儲家久資三善得生朝相去半旬強五千餘卷學尤富一百齊年身更康都省先曾同舉酒負闈最喜又傳觴易逢皓齒今歌曲難值嚴更聽警場慶事昇來真可卜祝君黃髮相虞唐

題孫谷橋墻間圖

墻間不足又之他猶自施一驕室家齊國一人如許爾寧知後日事如麻
因知義利本殊途莫笑墻間乞祭徒正使往來多顯者此

中尤要着工夫

肆赦小雨

時章廷之樞密在慶正樓上禮畢戲謂余君明長未免雨立歸途成小詩

端門宣赦樂歡然膏澤還應降九天始覺耳邊鳴槭、漸
看笏上溜涓、我班金闕雉竿側君侍玉皇香案前雨立
固知同陸楫一言猶幸賴優旃

題桃源王少卿占山亭

納、乾坤一草亭西山盡見若秋屏霜餘遠水呈天碧雨
過庭空現帝青逸客真成陶令隱高懷長似屈原醒肯堂
固賴賢孫子精爽猶疑尚有靈

題汪季路侍郎所藏吳道子天龍八部

妙絕天龍八部圖細看真不失鎔銖聲名自足高千古題
品猶難遇二蘓旌旆冕旒猶可想鬼神人物亦何殊君看

坐位蘭亭草費盡工夫學得無二蘓謂子美子瞻也

謝顏樂閑篆離騷

樂閑下筆素推高攻媿耽書老更饕顧我好看秦小篆煩
君為作楚離騷晚年臥隱成輪扁痛飲猶堪寫鬱陶喜劇
但知藏十襲瓊瑤無以報投匏

題徐聖可知縣所藏楊補之二畫

誰種疎梅古岸頭推蓬瞥見倍清幽君看竹外一枝好真
有江南萬斛愁
梅花屢見筆如神松竹寧知更逼真百卉千華皆面友歲
寒祇見此三人

嵩岳圖有序

先祖太師齊國公元符中知河南府登封縣建炎

兵燬先集故物煨燼無遺兒時猶及見揚州伯父
藏嵩山圖丹青僅存雖傳錄廿四峰詩以生晚既
不逮事不知有石刻也張放遠為京西僚屬寄登
封舊碑得之驚喜唐律為謝
先世前蹤不可追君從何處得全碑上橫嵩岳三千丈下
列齊公廿四詩室號揖仙懷舊事庵名面壁認遺基青氈
真是我家物欲以瓊瑤厚報之

寫照葉處士求僧

幾年依樣畫葫蘆自作葫蘆學佛徒一筆從今勾斷了一
瓶一鉢任江湖

元日

歲當庚午旦庚寅最喜明朝遇上辛五福來臨吳越分更

欣三日即逢春

題郭恕先雪霽江行圖

妙絕丹青郭恕先幻成雪霽大江航沿流更飽輕帆舉上
水仍勞百丈牽揆拖長年渾欲動寒帷佳客若將仙侍親
曾泛滄浪月猶記蘭成射策年十八歲時侍先
行大江

寄題江西劉氏勤有齋

樸斲敷蓄皆用勤况吾儒者務多聞萬書插架非關我一
卷入心方屬君為學從來無止法立身寧止富多文自憐
習氣今猶在尚欲焚膏到夜分

書葛氏詩卷

詩有致仕心
開遠十首

未年六十早休官海角投閑儘自安一紀時容奉香火七
旬遂許掛衣冠重來深媿妨賢路此去終期保歲寒三上

封章歸未得葛家詩卷却羞看

殿上聞杜鵑

衰晚三年侍玉墀高梧又擢鳳凰枝封章屢上未容去更
向殿頭聞子規

王伯齊染髭

垂髭相見舜江濱荏苒俄驚過五旬顧我顏齡真似葉訝
君長鬣亦如銀萬金安得神仙藥一笑重來舊日春縱使
星一還復出不妨時作少年人

乞出過傳佾聞伯齊歸姚江

扶病還朝一秃翁重來寧免笑何公夢魂長是尋雲北歸
路何時到浙東深願葦身隨画鷁空勞舉目送飛鴻主人
竹所終須到最憶東軒一枕風

行香聞杜鵑

墻西綠柳杜鵑聲老我何堪側耳聽我自賦歸、不得不
須苦語更丁寧

送蔣甥若水僚屬北行

曾為假吏到燕山送子長征不作難故國能無歎禾黍中
原應欲覩衣冠黑甜飽宜加愛紅縑黃團正可觀行矣
勿為兒女戀指期良月待君還

夜讀王承家縣酒詩編

向來深夜烘揮塵不聽清談又許時淨洗昏眸急呼燭為
君讀盡一編詩

鍊句工深與味長固知家學富青箱莫言一鬢能嘗鼎更
欲為余傾錦囊

寒食

輔政無功日歎然佳時放賚屢傳宣已蒙授聚仍分茗既
荷更擊鮮酒號流香盛寶檠燭燃新火散青烟孫兒
不識君恩重但覓東宮賜劇錢

夫人携家泛湖

三分春色二分休始見軒泛綠舟諸子侍行歡盡日一
翁獨坐淡于秋滿斟美酒應同醉是處名園為少留陰靄
在前雷雨後特晴此日稱君游

即事

壯志摧頽貌亦衰豈知官舍傍岩隈此身不是京塵裏飯
了沿山看臘梅

劉寺即事

不到茲山二十年豈知重見舊山川煙深雖不見湖水且
看長空萬里天
飛泉何事仰空流無數明珠散不收注輦昔時曾撤殿至
今拋擲未曾休

澤發漕薦喜而成詩併勉杓

戊辰貢舉忝余知曾礙孫兒到省闈欣汝今秋重預薦喜
吾即日可言歸門闈有慶人爭賀父子同登世所希痴望
十人俱上第坐令畫錦信光輝

十月旦尚煖用夾公服二月初吉雪寒甚用單

尚煖先添夾方寒却用單不惟春料峭况值雪飛翻但款
朝儀肅難求已分安衣囊如款懶歸去老江干

從子淮過省寄伯中弟

興安樂石響于桐作阮猶堪繼仲容茂苑樂間真好事為
君添起晉玲瓏

觀冷泉亭放水

冷泉淺濁使人愁開板黃波去不休岸側細泉穿亂石始
知別是一清流

贈蜀二史有序

紹熙四年蜀士文德秀甫登科求致其事以榮親
先帝詔從其請其時任西掖預草詞命今皇帝策
士蜀又有二人為同姓史氏其一綿州司戶天應
與其子龔同登遂以身之官求封贈父母其一成
都府司戶公亮自陳素志晚得一官亦為此舉上
益嘉之各特循從事即致仕聖朝孝治之盛十九
年間見此三人坊維士風于是尤振輒成唐律表
賢喜之私仍寄後溪劉德修

老我掛冠慙復彈羨君登第遽休官幸有子事尤美專
以為親人更難舊說三賢皆持操今

寄弟

我家伯父德餘輝吾弟風標具體微七載欣聞五事奮四
人先喜一雄飛恐貧老尚甘葷食教子今方擢省闈他日
雙椿臨大柱麻衣俱換綠衣歸

贈僧文可往黃州東坡

一坡久矣郡城東居士來游地望崇問舍求田煩作計拈
槌豎拂看談空共分龐老沉江寶要奉澹州禿髻翁去作

開山第一代燈、相續到無窮

松林隱居

玫瑰先生文集卷第十



卷之二